



# Wantok

Niuspepa Bilong Yumi Ol PNG Stret!

K1 tasol

Namba 2161 Febueri 11 - 17, 2016 28 pes

**BEK 2 SKUL PROMOSIEN!**

**DABOL SKUL DES WANTAIM SIA**

Only at... **THEODIST** THE STATIONERY SUPERMARKET

Walgani Drive, POM Ph: 313 9800 sales@theodist.com.pg

Markham Road, LAE Ph: 472 5488 saleslae@theodist.com.pg

**K220** Inc. GST

Code: FT1061 Code: FT1061-GRN Code: FT1061-BLU

PROMOSIEN BAI ISTAP INAP NAMBA 29 DEI BILONG MUN FEBUERI 2016 O INAP STOK PINIS

# Paıt na birua i mas pinis long ol siti skul

Frieda Sila Kana i raitim

**NORMAN Morris, wanpela gret 9 sumatin long Kila Kila Sekenderi Skul i no bin ting olsem long namba tu wik bilong em long haikul bai em i bungim birua long han bilong ol wanskul bilong em yet.**

Norman em i wanpela bilong ol gret 9 sumatin husat i bin kisim bagarap taim bikpela paıt i kamap namel long ol sumatin we ol gret 10 i bin birua long ol gret 9.

Papa bilong Norman em i bilong Kavieng na em i wanpela soldia long Taurama Bareks. Em i tok long Fraide bai papa na mama bilong em i kam long skul long lukim ol lain husat i bin paitim em na tu long toktok wantaim skul edministresen wantaim ol papa na mama bilong ol gret 10.

Norman i no save long wanem as ol i paitim em. Em i stap long klasrum bilong em long Gret 9F taim em i harim nem bilong em long PA sistem olsem bai em i go long edministresen opis na rejista long go insait long ICT klas olsem wanpela ilektiv kos. Bihain long em i go bek long klasrum em wanpela boi long gret 10 i kolim nem bilong em tasol em i tok, em i no save long dispela boi olsem na em i wokabaut yet na go

insait long klasrum bilong em.

Bihain long namba 8 piried, taim tisa i go aut pinis, wanpela boi gen i kam long dua bilong klasrum na singautim em i go ausait long klasrum. Norman i ting olsem dispela boi em wanpela, tasol nogat. Em i kam wantaim grup boi na kirap nogut em ol i tromoi han long het bilong em na pes bilong em.

"Ol i rausim hanwas bilong mi na ol i traim long rausim bas fe bilong long poket bilong trausis tu. Mi no kisim bikpela bagarap long pes bikos mi blokim pes bilong mi," Norman i tok.

Long dispela taim ol wanklas bilong em tu i pret na ol i no traim long helpim em, na ol dispela sumatin husat i bin paitim em, ol i ranawe.

Dispela kain pasin em i no gutpela tru insait long siti na em i mas pinis, tasol em i wok bilong olgeta lain, papa na mama wantaim pikinini na ol skul edministresen long stretim.

Deputi Prinsipel Edministresen bilong Kila Kila Sekenderi Skul, Philemon Geidilo i tok, skul nau i gat tingting long kisim wanpela bikpela sekyuriti kampani long lukautim skul, wantaim helpim bilong lokal memba.



Norman Morris, Gret 9F sumatin i kisim birua long han bilong ol narapela sumatin long Kila Kila Sekenderi skul long dispela wik. Foto: Frieda Sila Kana.

## WANTOK TOKSAVE!

STAT LONG MANDE 01 FEBRUERI, WANTOK NIUSPEPA OPIS I STAP NAU LONG ANGAU DRAIV, BOROKO.

MIPELA I LUSIM ABLE COMPUTING HAUS LONG SENTRAL WAIGANI, LONG FONDE 28 JANUERI NA I GO LONG DOVE TRAVEL SEVIS HAUS LONG SEKSEN 24, LOT 25, ANGAU DRAIV (KONA BILONG LAHARA AVENUE), BOROKO.

Opis fon namba (325 2500) na fex namba (325 2579) bai stap wankain yet tasol ol email adres bilong olgeta wokman na meri bai senis. Pastaim email adres i pinis wantaim dispela mak, @wantok.com.pg, tasol nau em bai pinis wantaim @wantokniuspepa.com.

Nau yet ol telikom I no konekim ol len lain bilong mipela yet tasol yu ken ringim mipela long ol mobail namba olsem:

Ol mobail namba long ringim mipela long bisnis em:  
73329467 - Elizabeth Konga  
Jeneral Menesa  
76210007 - Lesley Bentz  
Edvetaising na Sels Menesa  
72739408 - Veronica Hatutasi - Edita  
73650795 - Edvetaising

Long bisnis toktok, sapos yu save long mobail namba bilong wanpela wokman o wokmeri orait ring long mobail tasol na toktok.

Toksave i kam long Jeneral Menesa, Elizabeth Konga.

## TOKSAVE!



"Friends"  
"Kaibigan"  
"Wantoks"

**MANILA**  
**k1,708\***  
RETURN

Call toll free 180 3444 for more information.

**Air Niugini**    
www.airniugini.com.pg 

\*Ex Port Moresby. Conditions Apply.

# WINIM K1,000 MAMA FLAME MEKIM BILUM KOMPETISEN

Mekim bilum bilong yu yet wantaim Flame Flour mak. Laikim Facebook peis na postim foto bilong yu wantaim bilum yu karim na yu bai gat sans long winim. (Fopela inap long winim. Wapela long wanwan region)

go to FlameFlourPNG on Facebook



## Lupari kisim ples bilong Sir Manasupe

**MAN** husat i bin Sif ov Staf bilong Praim Minista Peter O'Neill, Isaac Lupari, i kisim ples bilong Sir Manasupe Zurenuoc olsem Sif Seketeri bilong Gavman.

Praim Minista Peter O'Neill i tokaut las wik olsem Mista Lupari i kisim ples bilong Sir Manasupe, husat i sik na i lusim wok.

Mista O'Neill i tok Mista Lupari i gat planti save long wok bilong pablik sevis na em inap long mekim dispela wok bilong Sif Seketeri.

Mista O'Neill i tok ol ekspirens na save bilong Mista Lupari bai helpim gavman long dispela taim kantri i wok long bungim sampela hevi long ikonomi bilong kantri taim prais bilong ol komoditi i pundaun go daun.

Mista O'Neill i tok Mista Lupari bai pinisim sampela ol gutpela wok Sir Manasupe i bin mekim taim em i bin stap Sif Seketeri.

"Sif Seketeri bilong Gavman em i namba wan posisen long pablik sevis, na Mista Lupari bai wok strong long helpim gavman i kisim ikonomi bilong dispela kantri i go antapmoa yet," Mista

O'Neill i tok.

Mista Lupari i bin wok olsem Sif ov Staf bilong opis bilong Praim Minista na pastaim em i bin stap Sif Seketeri tu.

"Wankain olsem ol arapela kantri, kantri bilong yumi i save salim ol komoditi na kisim mani. Taim prais bilong ol komoditi i go daun, gavman i bungim sampela salens we i nidim strongpela lidasip.

"Mipela i nidim strongpela menesmen long pablik sevis na Mista Lupari bai go pas long lidim pabik sevis.

"I gat planti wok long mekim i stap. Ol dispela wok bai larim ol pipel i kisim gutpela sevis na Sir Manasupe i lusim dispela wok. Mista Lupari bai nau mekim dispela ol bikpela wok long ranim pablik sevis bilong PNG taim kantri i wok long bungim hevi."

Mista O'Neill i tok tenkyu long Sir Manasupe i bin lukautim pablik sevis bilong PNG na tu long lukautim ol pipel bilong Morobe Provins taim em i bin wok olsem Morobe provinsal administreta.

"Hia long PNG, i no gat planti man olsem Sir Manasupe i stap na mi amamas long wok wantaim em.

"Sir Manasupe i bin stap olsem wanpela strongpela lida na lidasip bilong em i mas kamap olsem piksa we ol pablik sevan manmeri i mas bihainim.

"Mi tok tenkyu long Sir Manasupe long komitmen bilong em long PNG na tu long sampela rifom em i bin bringim i kam long gavman.

"Distrik Developmen Atoriti (DDA) em i wanpela rifom Sir Manasupe i bin bringim i kam long kantri bilong yumi na dispela bai larim gavman sevis i pundaun klostu long ol manmeri stret.

Sir Manasupe Zurenuoc bai lusim wok long mun Februeri long dispela yia.

Sir Manasupe em wanpela senia pablik sevan long kantri na em i bin wok hat tru na sevim gavman bilong dispela kantri longpela taim stret.

Tasol las yia em i bin kisim wanpela sik ol i kolim Pakinsons Disis na em i no inap long mekim wok bilong gavman. Dispela sik i mekim na em i risain na lusim wok.

Pakinsons Disisem i sik bilong kru na het we i save mekim han masol bilong man i guria.

## Sekenderi Skul givim mekim save



Ol sumatin meri sanap nabaut long skul bihain long pait namel long sku i salim ol gret 10 i go long haus. Poto: Frieda Sila Kana.

Frieda Sila Kana i raitim

KILA KILA Sekenderi skul long Nesenel Kapital Distrik i givim mekim save long ol gret 10 sumatin bilong en, tupela wik tasol bihain long skul i stat.

Tunde long belo taim bikpela pait i kirap namel long ol gret 9 na gret 10.

"Mipela i laikim pinisim dispela kain trabel long em i no ken kamap moa. Olsem na mipela bai pinisim ol sumatin husat bai mipela i painimaut olsem ol i asua. Mipela bai givim ol open transfe na ol papa na mama i ken kisim ol i go long narapela skul," Deputi Prinsipal, Edministresen, Philemon Geidilo i tok.

Mista Geidilo i tok moa olsem skul i bin ran gut tasol long asde Trinde wantaim ol gret 9, 11 na 12 tasol.

"Mipela i bin sindaunim ol gret 9 na 10 long Tunde na askim ol sapos ol i birua long narapela. Long wankain tiam ol gret 12 i tok ol bai helpim long stopim tru dispela kain pasin insait long dispela skul bikos ol tu i bin stap insait long dispela kain hevi taim ol i bin kam insait long gret 9." Mista Geidilo i tok.

Skul edministresen i givim pas i go long tupela sumatin pinis long givim long papa na mama bilong ol, bihain long dispela hevi.

Em i toktok wantaim papa bilong wanpela bilong ol pikinini husat ol i bilip em i as bilong ol trabel i kamap long skul long las wik na dispela wik. Wanpela bilong ol skul mangi husat i stap long trabel em i pikinini bilong wanpela loiya man.

Skul edministresen i tok bai ol i givim open transfe pas i go long ol dispela sumatin husat i kamapim hevi long ol narapela sumatin o bai ol i pinisim ol long skul.

Tripela de ol bihain long ol tisa i bin statim wok, ol ausait lain i bin kam insait long skul na kamapim birua long wanpela tisa bilong Filipins. Ol i bin pulim hanbek bilong Mis Avio, IT tisa na sutim em long naip tupela taim, long taim em i wok long wokabout i go long bungim ol wanwok bilong em. Ol skul i kisim tisa i go long haus sik na dispela wik tasol em i pinis long haus sik na i kam bek.

Bihain long taim skul i stat long namba wan wik, ol ausait lain i kam insait na kirapim pait wantaim ol sumatin. Ol tisa na ed-

ministresen i no mekim wanpela samting yet na hariap tumas ol sumatin yet i pait namel long ol yet. Stori namel long ol sumatin na ol tisa i tok olsem ol gret 10 sumatin i laik kirapim bel bilong ol gret 9 sumatin long pait olsem na ol i raun long kisim mani long ol narapela sumatin.

Tupela sumatin i kisim bikpela bagarap na planti i kisim liklik bagarap taim ol gret 10 na gret 9 i tromoi ston i go i kam long Mande na Tunde dispela wik.

Long dispela as, skul edministresen i saspenim klas bilong olgeta gret 10 na salim ol i go long haus inap tupela de.

Long tumora Fraide ol sumatin bai go long skul wantaim ol papa na mama bilong ol long toktok wantaim skul edministresen. Polis Stesin Komanda bilong Badili Polis Stesin wantaim sampela polis man bai givim sekyuriti sapat na tu bai Komanda i toktok long ol sumatin long pasin bilong brukim lo na ol mekim save we i save go wantaim.

Mista Geidilo i tok, klostu taim bai ol i singautim wanpela P&C miting wantaim ol papa na mama bilong ol sumatin long stretim ol toktok bilong skul.

Supporting PNG MADE



## Friends bring you the best deals

Save money everyday on the friendlier network

76003555 or 1555 connect@bmobile.com.pg

Connect with us on

www.bmobile.com.pg

# Man go pas long maining projek i dai

WANPELA biknem man Fiji husat i bin go pas long kirapim Mt Kare gol-silva projek i dai pinis.

Kantri menesa bilong Indochine Mining Limited, George Niumataiwalu, i dai pinis long Desemba las yia tasol i no gat wanpela nius i bin kamap long PNG.

Indochine Mining Limited i lukautim Mt Kare gol-silva maining projek na Mista Niumataiwalu i bin mekim planti gutpela wok long bungim ol papagraun na stretim toktok long kirapim maining projek.

David Tabi, husat i wanpela papagraun bilong Mt Kare gol-silva maining projek, i tok em i sori tru long harim olsem Mista Niumataiwalu i dai pinis las yia.

"Mi no bin save olsem em i dai pinis las yia. Mi harim las wik tasol na mi laik salim tok sori bilong mipela ol papagraun i go long famili na kampani bilong em," Mista Tabi i tok.

Mista Tabi i makim maus bilong ol papagraun bilong Hela sait na salim tok sori i go long kampani Indochine.

"Mipela i soritru olsem kampani i lusim wanpela gutpela wokman husat i save gut tru long Mt Kare projek. Mipela i laik wok bung gen wantaim nupela kantri menesa bilong Mt Kare," em i tok.

Em i tok Mista Niumataiwalu i bin mekim planti gutpela wok long helpim ol papagraun long glasim gut wanem papagraun klen i papa tru bilong dispela maining projek.

Mista Tabi i stap long

Hela sait na mekim dispela toktok. Ol klen na papagraun grup bilong Hela na Enga i resis long kamap papagraun bilong Mt Kare.

Las wik narapela papagraun long Enga sait i singautim Nesenel Gavman long stretim ol pepa wok long hariapim maining projek.

Dispela papagraun i stap long Paiela na toktok wantaim Wantok Niuspepa. Em i tok Nesenel Gavman i mas kirapim Mt Kare projek hariap "bikos ikononi bilong kantri i nidim mani long ran gut."

Dispela papagraun i les long tokaut long nem bilong em tasol em i tok Nesenel Gavman i mas tingting long kirapim Mt Kare neks yia.

"Sapos Indochine i no fit long kirapim Mt Kare, Nesenel Gavman i mas kisim i kam insait narapela nupela divelopa husat i fit long kirapim dispela maining projek. Kantri i nidim mani long kirapim ikononi bikos foren risev bilong yumi i go daun na yumi nidim mani long ranim kantri," dispela papagraun i tok.

Em i tok ol papagraun long Hela na Enga sait wantaim i redi long wokbung wantaim kampani na gavman.

Mineral Risos Atoriti (MRA) i laikim ol papagraun bilong Mt Kare gol na silva maining projek long wokbung wantaim.

MRA i les long lukim ol papagraun bilong Mt Kare i kam raun long opis bilong MRA na askim kainkain samting long projek.

# Duma tok tenkyu long O'Neill

**NUPELA Minista bilong Pablik Entaprais na Stet Investment, William Duma, i tok tenkyu long Praim Minista Peter O'Neill i givim em dispela nupela wok.**

Mista Duma i tok tenkyu tu long Minista bilong Pablik Entapris na Stet Invesmen, Ben Micah, husat i bin wok strong long kirapim dispela dipatmen.

Dipatmen bilong Pablik Entaprais na Stet Invesmen i lukautim ol bisnis bilong gavman. Ol i kolim dispela Kumul Konsolidedet Holdings Limited (KCHL).

Mista Duma i tok em i lukim bikpela senis i kamap long KCH taim Minista Micah i bin lukautim dispela dipatmen long yia 2012 i kam inap 2016.

"Mi lukim planti gutpela

samting i kamap long KCH taim Micah i kamap minista. Mi bai no inap rausim ol wok manmeri Micah i makim pinis tasol mi bai stap wantaim ol na sapotim ol long mekim planti gutpela wok ol i wok long mekim," Mista Duma i tok.

Em i tok em bai putim was long larim ol wok manmeri i bihainim nupela wok polisi bilong KCH.

"Dipatmen i gat nupela polisi i stap. Mi bai sanap na putim ai long sekim na larim ol manmeri i bihainim dispela polisi na mekim wok stret.

"Ol wok manmeri na kampani i no ken ting ol i wok long kampani bilong gavman na i bikhet. Em i kampani bilong pipel na bilong dispela kantri.

"Yumi mas wok gut wantaim gutpela tingting. Praim

Minista O'Neill em i bin save olsem Minista Micah em i rait man long kirapim dispela dipatmen. Olsem na em i makim Micah i kamap Minista.

"Micah i mekim gutpela wok na taim hatwok bilong em i ples klia kamap gutpela samting, Praim Minista O'Neill i makim mi kamap nupela minista long kisim KCH i go moa yet.

"Mi laik tok tenkyu long Praim Minista O'Neill i gat strongela bilip long mitupela Micah i lukautim dispela dipatmen," Mista Duma i tok.

Tripela wik i go pinis, Mista Duma i bin tok politikal pati bilong em, Yunaited Risos Pati (URP), no gat wanpela plen long lusim dispela kolisen gavman bilong Praim Minista Peter O'Neill.

Mista Duma, husat i Pati

Lida bilong URP Pati na Memba bilong Hagen, i bin tokim moa long 5,000 manmeri long Kik Viles ausait long Mt Hagen olsem ol memba bilong URP bai sapotim yet PNC Pati.

Mista Duma i tok URP bai wok bung na sapotim gavman long givim sevis long pipel na kirapim kantri.

URP em i namba tri kolisen patna bilong Pipel's Nesenel Kongres (PNC) Pati bilong Praim Minista O'Neill na dispela politikel pati i gat bikpela namba bilong ol memba long gavman.

"URP Pati na pipel bilong Mt Hagen bai sapotim gavman bilong O'Neill i bihainim gavman polisi na givim moa sevis long ol pipel bilong dispela kantri," Mista Duma i tok.



are you **Savings fit?**

Give your savings a workout by opening a **PLUS SAVER, TERM DEPOSIT** or **KIDS SAVINGS ACCOUNT** today.

**Weekly Smartphone Giveaway:**

Simply open a new **BSP Plus Saver, Term Deposit** or **Kids Savings Account** before 31<sup>st</sup> March, 2016.

**BSP**

www.bsp.com.pg

# Program long divelopim konsevesen

**Charlpetson Koi i raitim**

**CHIMELONG** Grup bilong Kampani Limitet i salim sampela delegesen long go lukim PNG. Minista bilong Envauiromen na Konseven na Klaimet Senis, John Pundari,

i mekim isi long dispela raun bihain long em i go lukim Chimelong Ju long Saina. Minista i bungim Su Zhigang, papa na siaman bilong Chimelong Grup bilong Kampani.

Dispela kampani i bin kamap long 1989 Chimelong Grup i gat tripela bikpela kwaliti turisim entaprais sait long Saina we i Guangzhou hap, Zhahai na Qingrei hap.

Chimelong Ju delegesen i bungim Praim Minista Peter O'Neill, Minista Pundari, nupela Minista bilong Turisim, Justin Tkatchenko.

Praim Minista i amamas long harim Chimelong Ju i wanbel long helpim PNG long divelopim ol konsevesen program bilong em insait long pablik praiwet patnasip. Wanpela patnasip i ken lukim kampani i mekim invesmen na bildim, salim teknoloji na givim mani long en.

Minista Pundari i tok moa olsem dispela patnasip program wantaim Chimelong Ju i bikpela samting we PNG bai kisim bikpela helpim long baiodaivesiti proteksen, konsevesen na enimal ol eksenis program na turisim.

Taim ol enimal bilong mipela i stap insait long Chimelong Ju bai ol i laik lukim naispela kantri bilong mipela na lukim ol bikpela maunten, ol rot long bikpela bus na kain kain plent, pisin, enimal na ol binatang na kain kain kalsa bilong PNG.

Ol delegesen bilong Chimelong Ju i raun lukim Baiya Riva Waillaip hap long Westen Hailans, Varirata Nesanel Pak long Sentral provins, Edvensa Pak na Motu Pore Ailan.

Minista Pundari i tok gavman i putim planti mani long ol Pak insait long kantri.

Wanpela wokmeri bilong wanpela NGO i mekim klia ol wok bilong konsevesen long ol sumatin.



## Bilip bilong ol mama kamapim medikol sip

**Frieda Sila Kana i raitim**


AUSTRALIA Petron bilong MV YWAM PNG Trening na Medikol Sip amamas long pasin ol PNG Gavman na ol pipel i soim long kisim dispela sip wantaim ol volantia wokman na meri bilong em i kam insait long kantri.

Mike Reynolds, Petron bilong MV YWAM PNG long Queensland Australia i bin kam long Pot Mosbi wantaim namba wan raun bilong sip long dispela yia bihain long sip i kisim namba tu hap bilong redim em olsem trupela medikol sip.

"PNG i gat ol strongpela pipel wantaim strongpela tingting. Em i wok bilong ol dona na dispela Trening na Medikol Sip i stap. Tingting bilong kisim bikpela sip olsem i bin kamap taim liklik lain mama insait long bus bilong Galp provins long yia 2010 i bin bungim K2,000 na i tokim YWAM Medikol na Trening tim olsem ol i gat bilip na hop long bikpela sip i gat haus sik long en," em i tok.

Mista Reynolds em i wanpela longpela taim Poroman bilong Pot Mosbi siti na PNG bikos long sait bilong famili, sista bilong em i marit long Wes Nu Briten taim em i bin stap olsem wanpela tisa na prinsipel bilong ol Intenesenel Skul long PNG.

Namba tu em, taim Mista Reynolds i bin stap Meiya bilong Townsville long 9-pela yia em i bin kamapim wok Poroman wantaim Nesanel Kapital Distrik long



Mikroskop anpap long medikol sip.

Townsville kamap sista siti bilong Pot Mosbi. Mista Reynolds i bin stap olsem wanpela Memba bilong Queensland Palamen na pastaim long em i ritaia, em i bin spika bilong Palamen bilong Queensland.

Olsem na wok bilong em olsem petron bilong MV YWAM PNG Trening na Medikol Sip i no hat tumas, maski em i mas lusim ples na kalap long sip na raun wantaim olgeta volantia kru na medikol tim long solwara.

"Em i nais tru long wok wantaim ol pipel bilong Papua Niugini bikos sista bilong mi i marit long PNG na mi gat 3-pela kandre husat i hapkas Papua Niugini nau i stap long Adelaide, Melbourne na Brisbane," Mista Reynolds i tok.

Em i tok sista bilong Diane Korare i bin stap pinsipel bilong Pot Mosbi Intenesenel Skul inap 23 yia.

Long dispela wik, Wantok Niuspepa i bin gat amamas long bungim Mista Reynolds antap long sip taim em i kam sua long Pot Mosbi basis.

Wok bilong Mista Reynolds olsem Petron bilong sip em bilong strongim wok bung bilong tupela gavman bilong Australia na Papua Niugini long wok bisnis na komyunikesen na long wok wantaim ol provinsal gavman bilong ol provins we wok bilong Medikol Sip i karamapim. Em i stap petron inap 7-pela yia nau stat wantaim olupela MV Pasifik Link na nau i go long nupela MV YWAM PNG.

Mista Reynolds i tok

tenkyu tru long nesanel gavman na ol provinsal gavman husat i bin putim bikpela mani helpim long baim dispela nupela sip. Em i tok tenkyu tu long Australia Eid (AusAID) na ol kopret bisnis haus olsem Stimsip, PUMA Eneji, InterOil, na planti narapela olsem PNG Pots Kopresen husat i save larim sip bilong YWAM i anka nating long olgeta basis bilong solwara bilong PNG na i no save baim.

"Mi tok tenkyu long PNG Pots Kopresen bikos olgeta hap mipela i go long ol provinsal basis em mipela i anka nating tasol. Em i bikpela samting bikos mipela i volantia ogenaisesen na mipela i save was gut tru long yusim ol mani bilong wok gut." Mista Reynolds i tok.

## Riviu bilong dispela wik...

### K8milien long stopim TB

NESENEL gavman i givim K8 milien long program bilong stopim sik Tubekulosis (TB) long Daru, Westen Provins. Seketeri bilong Helt, Pascoe Kase i bin tokaut lopng dispela samting long ol nius lain las wik. Em i tok em i laik lukim ol manmeri olsem ol dokta na nes husat bai wok tru i ken go long dispela hap we sik TB i strong tru na maski long ol man i pasim nektai na go raun nating. Long dispela wik ol lain bilong UNAIDS, Wol Helt Ogenaisesen na Dipatmen bilong Foren Afeas long Australia bai go long Daru long glasim hevi bilong sik TB long hap.

### Lus long solwara inap 41 de

TUPELA man bilong ples Fissoa long Nu Ailan i kam bek long PNG bihain long ol i lus long solwara inap 41 de na kamap long Federetet Stet ov Maikronesis (FSM). Ol tupela man ya Rickson Masol na Chris Pagan wantaim 4-pela arapela i lusim ples bilong ol long Septemba 2015 long go long Simberi tasol ensin bilong bot i bagarap na ol i drip i go aut long solwara. Ol i drip inap 6-pela wik na ol lain long Atol Ailan long FSM i bin painim ol.

### Tingim MV Rabaul Queen

WANPELA memorial ston i stap long Kimbe bris nau long tingim ol dispela 71 pipel husat i bin dai long taim sip MV Rabaul Queen i go daun long biksolvwara long Febueri 2, 2012. Wanpela man husat i bin stap insait long dispela birua na i stap laip nau, Alphone Liato i bin sanapim dispela memorial ston. Gavanba bilong Wes Nu Briten Sasindran Muthivel i bin opim. I bin gat 151 pasindia i bin kalap long dispela sip na 71 i bin dai na 80 i bin orait.

### Ileksen long Jun 2017

Nesanel ileksen bai kamap long Jun 2017. Ilektral Komisina Patilas Gamato i tokaut olsem em i mas gat K182milien long mekim dispela wok bilong nesanel ileksen. Nominesen bai op long Epril 20 na pas long Epril 27. Vot bai stat long Sarere Jun 24 na pinis long Sarere Julai 8. Olgeta wok bilong ileksen bai pinis long Mande Julai 24. Mista Gamato i tok taim bilong nominesen em 7-pela de na i gat 8-pela wik long kepen na taim bilong vot em 14 de. Em i tok ol i redi long mekim ol wok bilong 2017 ileksen tasol bai ol i nidim sampela moa mani long gavman.

### TESAS bai karamapim 4,700 studen tasol

GAVMAN bai givim TESAS skolasip long 4,700 studen tasol namel long 23,000 gret 12 studen husat i bin sindaun long eksam long 2015. Ol papamama i mas baim skul bilong ol pikinini bilong ol sapos ol i no winim TESAS skolasip. Minista bilong Haia Edukesen Malakai Tabar i mekim dispela tok save las wik bihain long planti komplek i kamap long ol papamama. Gavman i bin plen long givim skolasip long 15,000 studen tasol bikos mani i sot, bai ol i givim TESAS skolasip long ol 4,700 nupela studen na 7,400 studen husat i stap pinis long sistem.

# ITI Skolasip em i blesing bilong God

Frieda Sila Kana i raitim

**KONIO Gamu bilong ples Haunabada insait long Nesenel Kapital Distrik em i wanpela laki yangpela meri long kisim wanpela skolasip bilong Intenesenel Trening Institiut taim em i bin wokim gret 12 long Lae Sekenderi Skul las yia.**

Mis Gamu em i bin het gel bilong Lae Sekenderi Skul na long de bilong gredusen long las yia, em i bin amamas long lukim ol menesmen bilong ITI long Lae Kempas i bin go long skul bilong em na makim em olsem wina bilong 2016 ITI skolasip.

Wantaim dispela skolasip, Mis Gamu bai inap long wokim wanpela 17 wik kos

long Human Risos we bai em i kisim wanpela setifiket long taim em i pinisim trening bilong em. Em i bin wanpela bilong ol 60 skul liva bilong las yia husat i bin kisim ITI skolasip. Mani mak bilong Skolasip long olgeta wantaim em i K200,000 na em bai karamapim kos bilong olgeta samting ol i nidim long skul.

Ol papa na mama bilong Konio i bin amamas tru na kamap long taim bilong givim aut dispela skolasip bikos papa bilong Konio, Reveren Ovia Gamu em i wanpela Minista long Yunaitet Sios na em i save wok olsem Saplin bilong Yuni- vesiti bilong Teknoloji long Lae. Reveren Ovia na Mara- ma Boio Gamu i tok, dispela

em i blesing bilong God long laip bilong tupela, bikos ol i wok long sios na ol i no gat mani long putim Konio long wanpela koles.

Mis Gamu i bin kisim awod long go long Lae ITI tasol wok bilong papa bilong en i transfe i go long Pot Mosbi Eben Rijon bilong Yunaitet Sios olsem na ol i kisim Konio i kam long Pot Mosbi tu. Nau ol i stap wetim taim bilong sios bai makim ol long go long wanpela hap bilong wok misin insait long Pot Mosbi Eben Rijon.

Mis Gamu i makim ol sumatin meri husat i kisim skolasip na tok bikpela tenkyu i go long ITI Jeneral Menesa long gutpela pasin bilong helpim ol kain lain olsem em.

# Bilip bilong ol mama kamapim medikol sip

Frieda Sila Kana i raitim

AUSTRALIA Petron bilong MV YWAM PNG Trening na Medikol Sip amamas long pasin ol PNG Gavman na ol pipel i soim long kisim dispela sip wantaim ol volantia wokman na meri bilong em i kam insait long kantri.

Mike Reynolds, Petron bilong MV YWAM PNG long Queensland Australia i bin kam long Pot Mosbi wantaim namba wan raun bilong sip long dispela yia bihain long sip i kisim namba tu hap bilong redim em olsem trupela medikol sip.

"PNG i gat ol strongpela pipel wantaim strongpela tingting. Em i wok bilong ol dona na dispela Trening na Medikol Sip i stap. Tingting bilong kisim bikpela sip olsem i bin kamap taim liklik lain mama insait long bus bilong Galp provins long yia 2010 i bin bungim K2,000 na i tokim YWAM Medikol na Trening tim olsem ol i gat bilip na hop long bikpela sip i gat haus sik long en," em i tok.

Mista Reynolds em i wanpela longpela taim Poroman bilong Pot Mosbi siti na PNG bikos long sait bilong famili, sista bilong em i marit long Wes Nu Briten taim em i bin stap olsem wanpela tisa na prinsipel bilong ol Intenesenel Skul long PNG.

Namba tu em, taim Mista Reynolds i bin stap Meiya bilong Townsville long 9-pela yia em i bin kamapim wok Poroman wantaim Nesenel Kapital Distrik long Townsville kamap sista siti bilong Pot Mosbi. Mista Reynolds i bin stap olsem wanpela Memba bilong Queensland Palamen na pastaim long em i ritaia, em i bin spika bilong Palamen bilong Queensland.



Mista Mike Reynolds i sanap wantaim wanpela sejeri bet bilong ai klinik long sip.

Olsem na wok bilong em olsem petron bilong MV YWAM PNG Trening na Medikol Sip i no hat tumas, maski em i mas lusim ples na kalap long sip na raun wantaim olgeta volantia kru na medikol tim long solwara.

"Em i nais tru long wok wantaim ol pipel bilong Papua Niugini bikos sista bilong mi i marit long PNG na mi gat 3-pela kandre husat i hapkas Papua Niugini nau i stap long Adelaide, Melbourne na Brisbane," Mista Reynolds i tok.

Em i tok sista bilong Diane Korare i bin stap prinsipel bilong Pot Mosbi Intenesenel Skul inap 23 yia. Long dispela wik, Wantok Niuspepa i bin gat amamas long bungim Mista Reynolds antap long sip taim em i kam sua long Pot Mosbi basis.

Wok bilong Mista Reynolds olsem Petron bilong sip em bilong strongim wok bung bilong tupela gavman bilong Australia na Papua Niugini long wok bisnis na komyunikesen na

long wok wantaim ol provinsal gavman bilong ol provins we wok bilong Medikol Sip i karamapim. Em i stap petron inap 7-pela yia nau stat wantaim olpela MV Pasifik Link na nau i go long nupela MV YWAM PNG.

Mista Reynolds i tok tenkyu tru long nesenel gavman na ol provinsal gavman husat i bin putim bikpela mani helpim long baim dispela nupela sip. Em i tok tenkyu tu long Australia Eid (AusAID) na ol kopret bisnis haus olsem Stimsip, PUMA Eneji, InterOil, na planti narapela olsem PNG Pots Kopresen husat i save larim sip bilong YWAM i anka nating long olgeta basis bilong solwara bilong PNG na i no save baim.

"Mi tok tenkyu long PNG Pots Kopresen bikos olgeta hap mipela i go long ol provinsal basis em mipela i anka nating tasol. Em i bikpela samting bikos mipela i volantia ogenaiesen na mipela i save was gut tru long yusim ol mani bilong wok gut." Mista Reynolds i tok.

# PNGCLA Siaman AsBisop Ribat tok nogat long bagarapim ol meri

ASBISOP bilong Pot Mosbi Asdaiosis, na Siaman bilong Papua Niugini Kristen Lidas Alaiens long HIV na AIDS (PNGCLA), John Ribat, i autim wari bilong em long pasin bilong repim ol bikpela meri na ol yangpela meri long Morata long mun Desemba las yia na tu long ol ripot i kam long wankain pasin long ol narapela provins.

Em i tok pasin bilong ol lain i mekim dispela i soim olsem ol bikpela man na ol yangela mangi i no gat pasin bilong rispek long ol mama na ol yangpela meri. Dispela i soim olsem ol i no laikim na rispekim God na ol wantok bilong ol.

Dispela em i bikpela hevi na olgeta lain long sosaiti olsem sios, wan wan man na meri, ol famili, komyuniti na olgeta lain husat i save mekim wok bilong helpim ol lain i kisim hevi olsem long kama bung wantaim na stretim.

Asbisop Ribat i tok olsem Het bilong Sios long PNG na ol Pasto olsem Wasman bilong ol pipel i mas kisim wok bilong givim gutpela Kristen lidasip long strongim toktok bilong kamautim as bilong dispela kain jenda bes vailens na vailens long ol meri. Ol i ken wokim dispela insait long ol tok ol i autim long haus lotu bilong ol wan wan, insait long ol baibel

stadi na long ol komyuniti autris program.

Ol tok yumi autim long haus lotu bilong yumi na ol baibel klas i mas toktok long ol dispela kain hevi bilong ol meri na vailens. Wok bilong tokaut long hevi na stretim em i soim wok bilong God long ples klia i go long wol we i go wantaim pre na mekim wok wantaim.

Kristen sios lida na ol sios memba i mas go insait long wok bilong edvokasi na tokaut long bel bilong Baibel olsem stori bilong salvesen o long God i kisim bek manmeri.

Pasin bilong God i kisim bek man em bilong stretim ol samting na oda we i bagarap pinis, na putim long wei God i laikim long en long yumi wan wan man na meri na komyuniti bilong ol bilip man bilong kingdom bilong God. Em i givim yumi hop long nau, maski samting tru bai kamap long bihain taim. Ol Kristen i mas go insait long wok bilong edvokasi olsem hap bilong dispela piksa bilong stretim ol samting i bagarap pinis.

Holi Spirit yet bai kirapim bel bilong ol long laikim bilong wokim gutpela pasin. Edvokasi na tokaut em i wok bilong harim tok bilong God na bihainim. Holi Spirit bai strongim ol long kain kain we long givim bel wantaim

na mekim dispela wok.

Edvokasi o pasin bilong tokaut long stretpela pasin long helpim ol Kristen em i wanpela eksampel bilong bihainim Tok bilong God, bel kirap long wokim stretpela pasin na laikim ol narapela na sori long ol lain husat i no gat planti samting na i stap tarangu, stap long mak bilong birua, na em i wanpela rot bilong soim ol long Jisas Kraus.

God i putim ol Kristen insait long planti kain hap bilong wok na long sosaiti, na olgeta dispela i mas senis sapos yumi laikim jenda bes vailens, na vailens long ol meri na HIV transmisen long pinis o i go daun.

Ol Kristen i mas yusim ol we bilong senisim pasin bilong ol man na meri wantaim toktok na lo bilong buk baibel. Em kain olsem long tok aut long pasin bilong bagarapim nating ol narapela manmeri na long pasin bilong lotu long god giaman, soim piksa bilong narapela kain sosaiti we God i laikim. Kristen bai gat strongpela pasin bilong toktok long ol atoriti sapos pasin bilong ol i no bihainim wanem samting Baibel i skulim. Ol bai pre long God long kam insait na bringim bel isi na wanbel pasin na long kamapim gutpela na stretpela sindaun we olgeta man na meri i stap long wankain mak.



Nupela sistem bilong Treid Print nau lukim ol papamama wantaim sumatin i sainim rekot fom taim wanpela sumatin i kisim sumatin skul kit bilong em. Dispela poto em bilong wanpela elementri sumatin long Ted Diro Elementri skul long Pot Mosbi. Poto: Frieda Sila Kana.

# National Narcotics Bureau i stap we?

NATIONAL Narcotics Bureau (NNB) i stap we? Dispela askim em i no kamaut long maus bilong wanpela man tasol.

Planti manmeri long PNG i wok long askim dispela kwesten bikos olgeta de, manmeri long olgeta hap long PNG i wok long ritim long niuspepa, harim long redio na lukim long TV olsem pasin bilong smokim mariwana na dring hombru i kamap bikpela moa.

Wanpela bikpela ki polisi bilong O'Neill-Dion gavman em long daunim hevi bilong lo na oda long ol wan wan komyuniti na haus lain insait long kantri.

Tasol gavman i lus tingting pinis olsem wanpela namba wan na ki gavman ejensi bilong daunim hevi bilong lo na oda em i NNB.

NNB i save mekim ol awenes na tokim ol manmeri long ol nogut samting bilong mariwana, hombru na ol arapela drag we lo i tok tambu long ol man i kisim.

Wanpela man husat i bin pastaim wok long NNB i tok dispela gavman ejensi i save mekim wok long daunim as stret bilong lo na oda long komyuniti na em i no save bilong wanem na dispela opis i pas.

Pastaim senia edukesen na awenes opisa bilong NNB, Lawrence Tau, i tok as tru bilong lo na oda asua i stap long drag na alkohol abius.

"Taim ol man i save smokim mariwana, het bilong ol i no save wok gut. Ol man bilong smokim mariwana i save mekim stil pasin na i ken mekim planti arapela pasin nogut.

"Mipela i bin kisim skul na trening long dispela na mi save. Ol man na meri bilong smokim mariwana i save kamapim planti trabel na nogut samting insait long komyuniti na haus lain.

"Taim ol i save kamapim dispela kain hevi, em ol i kirapim hevi bilong lo na oda nau. Ples na komyuniti i save kisim nem nogut.

"Tasol NNB i save mekim ol awenes toktok long komyuniti na haus lain. Ol awenes toktok i save tokim ol manmeri long no ken smokim mariwana.

"Mipela i save skulim ol manmeri long no ken planim mariwana. Ol lo bilong kantri i tambuim ol manmeri

long planim, salim, karim na smokim mariwana na ol arapela kain drag.

"Mipela i save go raun long ol skul, maket na pablik ples, ol haus sik, ol viles na long ol fil bilong pilai spot we mipela i save givim skul toktok na awenes long ol nogut samting mariwana na ol arapela kain drag i save mekim long laip bilong manmeri," Mista Tau i tok.

Mista Tau i no tokaut long as tru gavman i pasim dispela opis. Em i tok em i bin mekim planti ol awenes toktok bilong drag na hombru long ol liklik ples insait long Sentral Provins.

Long Jun 2014 taim ol i laik holim wanpela bikpela awenes bung bilong NNB long Kwikila, Mista Tau i bin kirapim nogut olsem gavman i stopim mani long go insait long akaun bilong NNB.

"Mi no save wai ol i mekim olsem. Gavman i no tok save gut long ol wok manmeri tu. Mipela i lukim olsem gavman i tokim Fainens Dipatmen long stopim mani bilong NNB.

"Ol wok man i lus wan wan. Mipela i pasim opis long Jun 2014 i kam inap na utu opis i pas yet," Mista Tau i tok.

Wantok Niuspepa i ringim opis bilong NNB tasol no gat wanpela man i kisim telepon. Opis bilong NNB long Pot Mosbi i pas yet. Ol sekuriti opisa tasol i wok long lukautim opis na haus.

Dispela haus we NNB opis i stap em i haus bilong TST Grup ov Kampanis. Gavman i wok long baim rent bilong dispela haus i stap nating na tu ol wok manmeri bilong NNB i stap nating na kisim potnait mani, Mista Tau i tok.

"Taim mariwana i bagarapim kantri bilong yumi, gavman i no mekim wanpela samting long stretim laip bilong manmeri husat i wok long planim, smokim na salim mariwana," Mista Tau i tok.

Em i tok ol polisman i wok long go insait long ol ples we ol i kisim tokwin olsem ol manmeri i planim mariwana na ol polisman i rausim ol mariwana.

"Ol polisman i no save long wanem kain samting nogut i stap insait long mariwana. Mariwana i gat planti kemikel nogut i stap insait. Na em i wok bilong NNB long skulim ol manmeri pastaim long ol nogut samting

bilong mariwana.

"Wankain olsem, mipela i save skulim ol manmeri long ol nogut samting bilong hombru. Hombru i save kampaim planti nogut samting long laip bilong ol manmeri. Mipela i save gut long dispela ol samting bikos mipela i save kisim trening.

"Bihain mipela i save skulim ol manmeri na tokim ol long no ken dring hombru na no ken smokim mariwana. Sapos ol i sakim tok, mipela i save wokbung wantaim polis na ol i save mekim save long ol lain husat i sakim tok bikos lo i tok tambu long smokim mariwana na dring hombru," Mista Tau i tok.

Oposisen Lida Don Polye i wok long singautim gavman long opim gen NNB bikos em i lukim olsem kantri i wok long bungim planti hevi long mariwana na hombru.

"Planti yangpela manmeri i wok long smokim mariwana na dring hombru long skul. Sampela i ranawe long skul wantaim yunifom na i smokim mariwana na dring hombru.

"Dispela i bagarapim bihain taim bilong dispela kantri na mi laikim gavman i mas opim NNB hariap," Mista Polye i tok.

Mista Polye i tok Oposisen i luksave olsem NNB em i wanpela ki gavman ejensi i stap aninit long lo na jastis sekta na em i save mekim wanpela gutpela wok long skulim ol manmeri long stap gut no ken bagarapim laip wantaim spakbrus na kainkain drag.

Mista Polye i nau askim ol papamama long lukautim gut ol pikinini bilong ol na tambuim ol long dring hombru na smokim spakbrus.

"NNB em i pas. Mipela i no save wanem taim gavman bai opim gen dispela opis. Tasol nau, mi laik salensim olgeta papamama long putim was gut na lukautim ol yangpela pikinini bilong yupela.

"No ken larim o i smokim mariwana. No ken larim ol i dring bia. Yangpela pikinini em i fiutsa bilong dispela kantri.

"Mi laikim ol papamama long skulim ol yangpela pikinini long go lotu, harim tok bilong God, ol i mas go pilai spot, go swim, na mekim ol gutpela samting," Mista Polye i tok.

# Gavman mas stopim bia long PNG

**WANPELA komyuniti lida long Enga Provins i tok PNG bai kamap wanpela gutpela kantri long mekim bisnis na stap gut sapos gavman i stopim bia insait long kantri.**

Kopen Kongo bilong Laiagam distrik long Enga Provins i singuat long gavman long pasim ol bia faktori insait long kantri na stopim bia bikos bia tasol i wok long kirapim planti trabel na pait insait long komyuniti.

Mista Kongo i lusim ples na i kam raun long Pot Mosbi na i autim dispela toktok long Wantok Niuspepa long dispela wik.

Em i tok em i lukim bia i kamapim planti nogut samting na trabel long Porgera-Lagaip distrik we ples bilong em, Laiagam, i stap.

Mista Kongo i tok Enga Provinsal gavman i stopim bia long Enga provins tasol ol man i wok long hait na kisim bia i go insait long provins.

"Bia em i tambu tru long ples tasol ol man i wok long kisim i kam insait yet na ol i dring ples klia. Dispela em i no gutpela pasin taim Enga provinsal gavman i stopim bia na ol man i dring bia ples klia olsem tru i nogat wanpela lo bilong dispela," Mista Kongo i tok.

Em i tok taim ol man i dring bia, ol i wok long brukim botol, pait, katim man, pasim maket, na kamapim planti pasin no gut we plantim manmeri long komyuniti i no laikim.

"Mipela i laikim ol turis long kam raun long ples bilong mipela. Mipela laik mekim bisnis na mipela i laikim ol investa long kam insait.

"Tasol bia i wok long bagarapim ples bilong mi. Stap long Sirunki, go long Laiagam na yu go long Porgera, trabel bilong bia i save kamap long wan wan wik," em i tok.

Mista Kongo i stap long

ples na taim em i kam raun long Pot Mosbi, em i ting trabel na hevi bilong bia i no stap long kapitel siti bilong kantri.

"Mi stap long ples na mi ting olsem ol ples lain tasol i save dring bia olsem pik na kirapim pait na trabel na mi kam long Mosbi na mi lukim olsem wankain samting i kamap long siti.

"Mi go raun long Morata na mi lukim ol manmeri i dring bia na danis, brukim botol, pait na mekim planti tok nogut.

"Manmeri wantaim i no gat rispek bilong ol narapela manmeri na ol i putim level bilong musik i go antap, ol i tok nogut na ol i mekim kain kain samting nogut we i no gutpela long ai na tingting bilong mi," Mista Kongo i tok.

"Gavman mas stopim bia. Pasim olgeta bia faktori insait long kantri bilong yumi," Mista Kongo i tok.

## O'Neill mas rausim Pala

OPOSISEN Lida Don Polye i tok Praim Minista Peter O'Neill mas rausim Ateni Jeneral Ano Pala bikos em i mekim planti rong samting.

Mista Polye i tok Mista Pala i no inap long mekim ol wok bilong Ateni Jeneral na tu, em i gat nem no gut pinis long Palamen na long kantri wantaim.

Mista Polye i tok sapos Praim Minista O'Neill i les long rausim Mista Pala i kamap Ateni Jeneral, Oposisen bai raitim wanpela pas i go long opis bilong Obudsman na askim Ombudsman long salim em i go long kot bikos em i brukim Lidasip kod.

Mista Polye i tok wanpela bikpela asua Mista Pala i bin mekim em taim em i bin givim kontrek bilong kirapim nupela Suprim Kot complex long Waigani long wanpela kontrakta.

Mista Pala i tok no gat wanpela samting i bin asua taim ol i bin putim tenda aut long pablik long resis long winim dispela tenda long kirapim nupela Suprim Kot haus long Waigani.

"No gat wanpela samting i bin asua long dispela projek. Mista Polye i no ken westim taim long toktok long dispela," Mista Pala i tok.

## Papagraun wanbel long wok

OL papagraun bilong Angore welhet aninit long PNG LNG Projek insait long Hela i tok tenkyu long Nesanel Kot jas Jastis Ambeng Kandakasi wantaim tim bilong en long mekim gutpela wok painimaut ol i mekim long glasim gut na painimaut ol tru tru papagraun stret long ol projek eria.

Ol papagraun siaman bilong tripela welhet long Angore i tok wok painimaut or altanativ disput resolusen (ADR) we Jas Kandakasi i bin go pas long glasim gut na painimaut ol tru tru papagraun bilong PNG LNG Projek eria i bin kamap gut tru stret.

Hari John Akipe, husat i siaman bilong Halapura klen, i makim maus bilong ol arapela lenona lida bilong Angore na tok tenkyu long gavman long kirapim dispela wok.

"Mipela olgeta papagraun bilong Angore i amamas long gutpela wok ol i mekim. Dispela bai helpim mipela long sanapim haus man na redi long mekim bisnis na skelim benefit bilong Angore ges projek bilong PNG PNG Projek, Hari Akipe i tok.

# PNG bai gat tripela nupela yunivesiti

I kam long ABC

## PNG bai gat tripela moa yunivesiti, Hai Edukesen Minista i tok.

Minista bilong Haia Edukesen, Malakai Tabar, i tok dispela bai helpim ol hevi bilong ol skolasip em kantri i wok long bungim nau.

Gavman i tingting long bildim inap long tripela moa yunivesiti long lukim olsem planti moa sumatin i kisim

yunivesiti edukesen.

Minista Tabar i tok bildim moa na impruvi ol yunivesiti we i stap pinis nau i wanpela ansa long isu bilong skolasip we i stap nau long kantri.

Mista Tabar i tok tu olsem hevi we i stap nau em long sait long spes long ol yunivesiti.

Em i tok dispela em long wanem, sapos spes long ol yunivesiti i pulap pinis, bai no gat wanpela sumatin

moa i ken go insait.

Minista Tabar i tok tu olsem ol yunivesitin yet i save makim ol sumatin em ol i ken go skul long ol yunivesiti.

Em i tok tu olsem ol sumatin tu i save paul long wanem, ol i no save long ol risat bilong ol, na dispela i save mekim i hat liklik long ol i save long wanem yunivesiti i kisim ol.

# PNG joinim rijon long edresim sastenebol menesmen bilong fiseris

NUPELA wok patna i kamap namel long Yunaited Nesens Developmen Progam (UNDP) na Nesanel Fiseris Atoriti (NFA) long kamapim nupela plen long kamapim gut laip na sindaun bilong ol piseris na ol samting i stap insait long solwara bilong Arafura Timor rijon.

As tingting bilong dispela projek em long gat marin fiseris we bai gat mani long lukautim, ol wok na long wankain taim tu, lukautim gut ples. Dispela em long Arafura-Timor rijon na ol komyuniti long hap i ken kisim gutpela samting long en aninit long konsevesen na sastenebol menesmen long ol marin kostel iko sistem.

Solwara long Arafura Timor rijon i gat ol planti

kain kain pis na ol samting bilong solwara long en, tasol ol i stap long hevi bikos ol man i wok long kisim na pinisim ol pis na ol arapela samting bilong solwara, moa polusen taim plantiu pipia i wok long go long dispela hap na ol kain samting olsem.

Long edresim ol dispela samting, UNDP na NFA i mekim ol plen long statim wanpela nupela projek.

Dispela projek bai helpim kamapim bek gut fiseris, kamapim gut ol plen na ol arapela kaikai bilong solwara we i wok long go daun, daunim polusen na kamapim ol samting long daunim klaimet senis.

“Olsem hap long wok bilong mipela long helpim go

hetim sastenebol developmen gols (SDGs), UNDP i amamas long sapatim sastenebol menesmen long ol nambis na marin risos long PNG taim ol i wok patna wantaim NFA. Dispela wok bai kontribuit long kamapim gut kwaliti bilong laip long ol pipel i stap long nambis eria na lukautim ol naturel risos long dispela kantri,” Roy Trivedy, em UN Residen Kodineta na man i makim UNDP long PNG i tok.

Dispela em i wanpela rijonal projek we ol kantri i serim boda long Arafura na Timor solwara olsem Australia, Indonesia, Timor Leste na PNG.

Projek bai stat long mun Septemba long dispela yia.

# PNG Simbu polis klostu bai holim pipal bihainim kilim dai long sanguma

I kam long ABC

PASIN bilong kilim ol narapela bihainim tokwin bilong sanguma i wok long kamap bikpela long PNG.

Provinsel PolisKomanda long Simbu provins i askim strong ol pipel blong Gumine distrik long holim kalabusim 7-pela pipel husat ol i sutim tok long ol long kilim wanpla famili i no long taim i go pinis.

Superintenden Albert Beli i tok ol wok painimaut em ol

opisa blong en i bin mekim i bin kisim nem bilong ol dispela husat i bin kilim 4-pela memba bilong wanpela famili bihainim ol tokwin bilong soseri.

Ol ripot i tok ol dispela man i bin kilim displea famili long wanem, ol i tok oli bin mekim sanguma long wanpela man husat i bin go daun na dai long wara long Lae, Morobe provins tupela wik i go pinis.

Pasin bilong kilim nating

ol narapela pipal bihainim tokwin bilong sanguma i wok long kamap olsem bikpela wari long PNG, moa yet long hailans rijon.

Jastis minista bipo bilong PNG, na Palaman memba blong Sinasina-Yonggamugl long Simbu Provins i askim strong nesanel gavman na olgeta lain long kantri i mas wok strong long stopim pasin bilong kilim nating ol narapela bihainim tokwin bilong Sanguma.

# Biksan long PNG na ren i bringim ol binatang no gut

I kam long ABC

PLANTI pipel long Papua New Guinea nau i bungim narapela hevi gen we drought o biksan na ren i kamapim.

Em ol binatang nau i wok long bagarapim ol nupela kaikai we ol pipel i wok long planim olsem kebis, swit poteto o kaukau, tapioka, banara, pampkin na ol kain kain kumu olsem.

PNG, Solomon Ailan na Vanuatu i bin kisim bikpela hevi long bikpela san taim we

El Nino i bin kamapim long 2015, tasol ol ren i wok long pundaun nau long dispela tripela kantri.

Planti fama long hailans rijon i planim ol kaukau, tasol ol dispela kaukau i no karim gutpela kaikai.

Matthew Kanua, em i wanpela konsalten husat i wok long lukluk long draut wantaim YunaitetSios long PNG i tok displea wari bai go hetyet na planti pipel long ol ples longwe long ol taun bai hangere yet.

Ol lain i stap long bikpela Tuna Fiseris konpres long Fiji long las yia Septemba: Poto: Wantok



# Komisina Baki givim namba long tupela long tupela deputi

Philemon Tame i raitim

**POLIS** Komisina, Gari Baki, i givim namba long tupela Deputi Komisina, Jim Andrews long Operesen na Raphael Haufolo long Edministresen, long Mande.

Kabinet Minista i strongim toktok bilong olsem ol i makim Deputi Komisina bihain long tupela i stap ekting komisina insait long 7-pela mun.

Komisina Baki i tok tenkyu long gavman long strongim toktok olsem nau tupela i Deputi Komisina.

Baki i tok, "Yumi i gat ol rait man long menesmen level em namba wan samting long ogenesesen na em i rot bilong developmen. Em i tru, i no long menesmen tasol, nogat. Long olgeta divisen i gat rait man i save penim konstabuleri gut tru.

"Gutpela tim i save mekim isi long wok i go gut na planti samting i save karim kaikai.

"Mi amamas long gavman i luksave na strongim olsem Mista Andrews na Mista Haufolo i kamap Deputi Komisina. Tupela Deputi Komisina i gat bikpela ekspirians na tupela i save pinis long wok bilong tupela insait long 7-pela mun na tupela i stap memba bilong konstabuleri inap tupela i kamap ekting komisina na nau tupela i Depyuti Komisina.

"Mi save olsem tupela i wokim dispela wok insait long 7-pela mun na nau mi amamas long mipela bai wokabaut olsem wanpela tim," Baki i tok.

Taim Komisina i givim namba long tupela, em i tok klia long ol senia opisa olsem top menesmen bai strong na orait long mekim ol disisen.

"Mi lukluk long bikpela ogenesesen long painim aut manpawa, risos, skil na rot long i no gat wanpela asua pasin i kamap long ogenesesen. Dispela bai strongim mipela long givim wok long ol gutpela wokman long mekim wok long stretpela rot.



Polis Komisina, Gari Baki, i putim namba olsem Deputi Komisina long yunifom bilong Deputi Komisina Edministresen, Raphael Haufolo.



Deputi Polis Komisina Operesen, Jim Andrews, (i kam L-R) Komisina Gari Baki na Edministresen Deputi Komisina, Haufolo, i sanap wantaim ol senia opisa bilong konstabuleri. Ol Foto: Philemon Tame

## Usino-Bundi i mas wanbel na senis

SALENS i go long ol pipel bilong Usino-Bundi long Madang provins long kamap papa long ol gutpela sans long senisim ol yet na ilektoret bilong ol, na i no ken wetim gavman tasol long mekim samting.

Rot long lukim ol gutpela senis em long kisim gutpela skul, kamapim sans bilong bisnis, go insait long ol developmen ajenda na lusim ol pasin tumbuna bai kamapim ol hevi.

Tupela pikinini man bilong Usino-Bundi, em Jimmy Uguro, husat i ek-

sekyutiv opisa wantaim Madang Provinsel Gavman na Bundi bisnismen, Edward Magarua Kiza i wokim dispela salens long lons bilong Wekumara Polti o kakaruk projek long ples Uria insait long Wod 19 eria long Usino LLG.

Wanpela wik woksop i bin kamap long Febueri 1 na pinis long de namba 5 i wanpela patnasip program namel long Wekumara Polti o kakaruk projek, Provinsel Gavman aninit long DAL na Ramu Nikel.

Woksop i bin ranim ol skul long

poltri prodaksen, invesmen sastenabiliti na entaprais menesmen.

"Mipela i no gat planti Usino-Bundi –Gama pipel long gavman na bisnis we i ken mekim ol samting i kamap long Usino-Bundi ilektoret.

"Mi laik lukim planti pipel i go insait long bisnis, go long ol bikpela skul na kamapim ol gutpela developmen insait long ilektoret bilong yumi. Yumi no ken lukluk i stap tasol,"bisnismen na papa bilong Tamane Geshaus, Mista Giza i tok.

## NEC makim Bando bosim Hela

NESENEL Eksektiv Kaunsil (NEC) i makim William Bando i kamap Hela Provinsal Administreta bihain long em i bin stap ekting provinsal administreta long yia 2012 i kam inap dispela yia.

Praim Minista Peter O'Neill i tok em i amamas olsem Mista Bando i bin ranim gut Hela Provins long 4-pela yia na kabinet i makim em i kamap administreta bilong Hela.

"Hela em i wanpela ki provins bilong PNG na gavman i luksave olsem em i nidim wanpela administreta long stap long provins na lukautim ol pablik sevan bilong kantri husat i wok long Hela Provins.

"NEC i gat bilip olsem Mista Bando em i fit man long mekim dispela wok. Em i ken bosim gut ol wok manmeri bilong Hela Provins na mipela i gat bikpela bilip long em,"Mista O'Neill i tok.

Oposisen Lida Don Polye i tok Hela em i nupela na yangpela provins tumas na em i nidim sapot bilong ol provinsal na nesanel

lida long kirapim dispela provins we bikpela LNG ges projek i kamap long hap.

"Em i gutpela NEC i makim Mista Bando i kamap provinsal administreta bilong Hela. Mi laik nau salensim ol lida bilong Hela long no ken pait long kisim lidasip.

"Olgeta lida bilong Hela i mas sapotim Gavana Anderson Agiru na wok wantaim em long kirapim Hela. Yumi gat provinsal administreta pinis, yumi gat provins pinis. Nau yumi mas wokbung na sapotim narapela i go kam,"Mista Polye i tok.

Hela Gavana Anderson Agiru i tok Mista Bando i bin ranim gut pablik sevis mesineri na ol wok manmeri bilong provinsal gavman.

"Mi amamas long Mista Bando i laik rausim ol wok manmeri husat i no save wok. Ol stil man na les man i no ken stap long Hela.

"Mi laik salensim Mista Bando long rausim ol les manmeri husat i no save wok tasol husat i save stap nating na kisim mani. Ol i

no ken stilim mani bilong gavman. Ol i mas wok na kisim mani.

"Mi laikim Bando long rausim dispela kain ol wok man husat i save brukim lo bilong kantri,"Mista Agiru i tok.

Mista Bando i tok tenkyu long NEC i gat strongpela bilip long em na makim em i kamap administreta bilong Hela.

"Mi laik tok tenkyu long Praim Minista Peter O'Neill, Hela Gavana Anderson Agiru, Memba bilong Tari-Pori na Fainens Minista, James Marape, Memba bilong Komo-Margarima, Francis Potape, na Memba bilong Koroba-Lake Kopiago, Philip Undialu, long sapotim mi long kisim dispela wok,"Mista Bando i tok.

Em i tok wanpela nambawan wok em bai mekim em long rausim ol pablik sevan bilong Hela husat i no save stap long provins na mekim wok.

"Hela Provins bai no inap givim sans long ol pablik sevan husat i save les long wok tasol stap nating na kisim stilim mani bilong

gavman,"Mista Bando i tok.

Mista Bando i mekim dispela toktok bihain long ekting Polis Stesin Komnada bilong Tari, Daniel Yangen, i givim tok lukaut long rausim moa long 50 polis manmeri husat i save brukim lo na mekim nabaut nabaut.

Mista Bando i tok provinsal administresen i stopim pei bilong moa long 90 manmeri husat i no save stap long provins na mekim wok bilong gavman.

Em i tok long mun Ogas las yia, provinsal administresen i bin rausim 57 manmeri long gavman peirol bikos ol dispela pablik sevan i bin stilim mani bilong gavman i stap.

"Plantim manmeri i no save wok na kisim pot nait pei nating. Bai mi putim nem bilong ol ples klia long niuspepa na larim ol yet i lukim na stretim ol yet wan wan," Mista Bando i tok.

Mista Bando i tok Hela em i nupela provins na em i no nidim ol les manmeri husat i no save wok tasol husat i ting ting long stilim mani bilong gavman.



# Treid Print givim namba wan skul kit



Ol elementeri pikinini i holim sumatin kit bilong ol. L-R (Elizabeth, Sandy, Kathy, Lavinia, Hesy, Theresia,) Poto: Frieda Sila Kana

Frieda Sila Kana i raitim

**TREID Print, wanpela lokal kampani we gavman i bin givim kontrak long givim aut ol skul metiriel long ol praimereri na sekenderi skul long kantri i bin wokim namba wan wok bilong givimaut ol metiriel long las wik insait long Nesenel Kepital Distrik.**

Ol i bin wokim dispela paillet program bilong givim aut sumatin skul kit long Ted Diro Praimereri Skul long Fraide 5 Februari. Tripela skul i stap long dispela paillet projek em Ted Diro Praimereri Skul, Sevese Morea na Ward Strip Praimereri Skul. Ol dispela sumatin skul kit i gat olgeta buk we ol pikinini bai nidim long skul bilong ol. Wan wan pikinini husat i gat nem long wan wan skul bai gat wanpela bilong ol dispela.

Hetmistres bilong Ted Diro Praimereri Skul, Misis Hane Charlie i tok tenkyu long Treid Print Jeneral Menesa wantaim ol opisa bilong en long gutpela wok ol i mekim long givim dispela ol sumatin kit long namba wan wik bilong sta-

tim skul stret.

Ol papamama i painim hat long baim ol dispela buk na long namba wan de bilong skul em ol pikinini i kam sindaun nating long klas. Tasol bikpela tenkyu long Treid Print i marimari na i no wetim mani tasol ol i wanbel long givim ol metiriel pas nating.

Hetmistres Charlie i tok olsem insait long dispela program em wan wan pikinini, maskim 2000 o moa long Ted Diro we ol i gat Elementari na Wod Strip we i gat moa long 3,000 sumatin, olgeta bai kisim wan wan sumatin kit i gat olgeta samting ol i gat nid long en.

Insait long Nesenel Kepital Distrik, Treid Print i makim tripela skul long kisim dispela kain Tisim na Lainim Risos Matiriel bilong 2016. Ol dispela skul em Ted Diro Praimereri na Elementeri Skul, Ward Strip Praimereri na Elementeri Skul na Sevese Morea Praimereri Skul.

Dispela em i mak tasol, na ol narapela skul bai kisim bilong ol tu klostu taim.

Insait long seremoni ol sumatin i bin kisim ol wan wan kit long han bilong Jen-

eral Menesa bilong Treid Print, Wilson David. Mista David i tok olgeta yia ol i save traime long bringim ol matiriel i go long ol skul we ol pikinini na ol tisa bai gat samting long statim skul. Dispela ol matiriel em Treid Print i wokim long kost bilong ol yet pastaim long gavman i baim ol long wok bilong ol.

Em i tok long bisnis bilong edukesen em 'taim' em i bikpela samting. Taim bilong skul i stat, ol sumatin na tisa i mas gat samting long skul, olsem na mipela i hariap long wokim dispela. Bihain bai gavman i baim mipela."

Asisten Seketeri bilong Edukesen long Nesenel Kepital Distrik Sam Lora i bin stap long dispela taim na em i tok tenkyu tu long gutpela wok bilong ol Jeneral Menesa bilong Treid Print, Mista David Wilson na ol lain opisa bilong em.

Em i tok gavman yet bai hat long mekim olgeta wok olsem na wok bung bilong praivet sekta em i bikela samting. Dispela em i hap bilong pablik-praivet pat-nasip plen bilong gavman.

# ITI Gren 2016 Skolasip – 200,000



Ol Skola wantaim Jeneral Menesa bilong ITI na Koporet Maketing Menesa Semi Rose kisim poto long ITI Pot Mosbi kempas. Poto: ITI Maketing

Frieda Sila Kana i raitim

INTENESENEL Trening Institut (ITI) i kam bek gen wantaim K200,000 skolasip mani bilong helpim ol sumatin husat i pinisim gret 10 na gret 12 long yia 2015 na i no kisim spes long ol narapela teseri institusen.

"Givim skolasip long ol tarangu pikinini em i wanpela we bilong mipela i mekim wok bilong mipela long helpim komyuniti na kantri," Menesing Dairekta, Kumaran Senthayval i tok.

ITI i bin statim kain skolasip long yia 2009 na long las yia em i bin givim wankain mak bilong mani em K200,000 olsem skolasip na long yia bihain ol i tingting long putim i go antap long K250,000.

Skolasip long dispela yia em i go long 60 sumatin na ol i kam long kain kain sekenderi na nesenel skul long olgeta hap bilong PNG. Ol dispela skolasip awod em ol maketing na edmin tim i bin

go long ol skul we ol i bin makim, long las yia na givim long taim bilong greduesen. ITI em i wanpela gutpela institusen long kantri we ol sumatin i skul long en i no save painim hat long kisim wok. Dispela em bikos kampani edministresen yet i save putim ol long wokfos long taim ol i stap long skul yet ol i save wokim ol prektikal wok bilong ol long ol kampani.

Mista Senthayval i tok olsem dispela skolasip bai karamapim olgeta samting we sumatin i nidim long pinisim ol setifiket o diploma kos bilong ol. Taim bilong pinisim wanpela setifiket trening kos em i 17 wik na taim bilong pinisim wanpela Diploma trening kos em 34 wik. Na bilong kisim Edvens Diploma ol sumtain i mas wokim narapela 17 wik antap long 34 wik.

Ol sumatin husat i kisim dispela awod em ol Prinsipel bilong skul wantaim skul akademik komiti yet i bin givim nem bilong ol i go long ITI.

ITI Jeneral Menesa i tok, ating long yia 2017 ol bai lukluk long kisim ol digri stadi tasol em i tok bikpela wok i stap yet long redim dispela long mak bilong Opis bilong Haia Edukesen bai givim tok orait long en.

ITI i save helpim ol yangpela man na meri insait long kantri long painim gutpela rot bilong ol i ken inapim ol driman bilong ol long sindaun bilong ol long bihain taim. PNG i mas developim moa human risos long kain gutpela haia edukesen skul olsem ITI.

I bin gat 16 sumatin i kisim skolasip bilong ITI insait long NCD, 5-pela long Sentral Provins, Isten Hailans i kisim 5-pela, Manus i kisim tupela skolasip, Westen Hailans na Jiwaka i kisim 9-pela skolasip, Morobe Provins i kisim 12-pela skolasip, Nu Ailan kisim 4-pela skolasip, Wes Nu Briten Provins kisim 5-pela skolasip na Milen Bei Provins kisim tupela skolasip.

# Komyuniti Volantia trening bilong skulim pikinini



Grup poto bilong ol volantia na ol patna (TAFE, Buk Bilong Pikinini na Wol Visen. Poto: Wol Visen PNG Komyunikesen

I GAT 18 volantia man na meri bilong ol setelmen insait long Pot Mosbi nau i statim pinis wanpela setifiket trening bilong lainim na lukautim ol liklik pikinini long Intenesenel Edukesen Ejensi skul (TAFE) wantaim helpim bilong Wol Visen PNG.

Ol dispela volantia tisa i kam aninit long wok bilong 'Buk Bilong Pikinini' we i wok bung wantaim Wol Visen aninit long Edukesen projek bilong ol long Pot Mosbi.

Wol Visen Projek Menesa bilong Pot Mosbi, Rose Niki i tok tenkyu long TAFE long trenim ol volantia. Em i tok tenkyu tu long patna bilong dispela wok, 'Buk Bilong Pikinini' long wok ol i save mekim long bringim literesi i go long ol liklik pikinini.

Nupela Operesen Menesa bilong Wol Visen, Smith Sapaka i tok amamas tu long TAFE IEA na Wol Visen long gutpela wok bung i go het yet. Em i mekim singaut i go

long ol narapela volantia long ol narapela hap we Wol Visen i wok olsem Atonomas Rijon bilong Bogenvil na Madang long wokim olsem.

Mista Sapaka i tok klia long skul bilong ol liklik pikinini olsem em i gutpela rot bilong PNG i go het. Olsem na em i gutpela long ol volantia insait long ol komyuniti i mas kisim save stret na klia long we bilong lukautim na lainim ol liklik pikinini.

Namba wan tripela mun bilong trening bai pinis long mun Epril long dispela yia yet. Ol volantia bai go mekim wok prektikel bilong ol inap long Septemba we bai ol i statim get namba tu hap bilong trening inap Novemba.

Namba tri na las hap bilong treniing bai stat gen long Februari 2017 i go pinis long Epril. Ol volantia bai greduet wantaim Setifiket bilong TAFE Koles.

# Banis sut bilong bebi i pinis long Madang

PLANTI ol bebi na liklik pikinini long Madang i no wok long kisim ol bebi sut long banisim ol long kisim sik bikos saplai i sot na ol hausik na klinik long Madang i no gat.

Wanpela mama wantaim pikinini man bilong em i bin go long Madang taun klinik long Mande long kisim bebi sut long banisim sik, tasol ol nes na sista long klinik i tok banis sut long hap i pinis.

Mama ya i no amamas bikos em i go kam sekim long kisim banis sut bilong bebi bilong em inap olsem tripela mun nau.

Dispela wari bilong mama ya em wankain tu long ol arapela long provins we i lukim nogat banis sut. Olsem na long Madang taun ol mama i save bringim bebi bilong ol i go long ol praivet

klinik o pamasi na baim na ol bebi bilong ol save kisim banis sut.

I no long taim i go pinis Madang provinsal helt dairekta, Marcus Kachau i tok olsem em i no lukim bikpela senis i kamap long ol helt program long provins.

Kauchau i tok Madang Helt Ofis i gat tripela bikpela eria long lukim long en. Dispela em long lukautim ol helt fasiliti na ol i mas wok gut, givim marasin long ol helt senta na givim sait medikol saplai nawok, na namba tri em long supavais o lukautim wok bilong ol rural helt senta..

Em i tokaut olsem em hatpela wok tru long lukautim na kontrolim ol rural helt senta long provins bikos long nogat gutpela rot na trenspot hevi, nogat

gutpela komyunikasin sistem na tu lo na oda hevi em bikpela.

Kachau i tok sampela olgeta dispela eria bilong wok i orait ating helt sevies i ken go aut moa long ol rurel ples long provins na wok orait stret.

Em i tok nau yet ol eria we helt opis long Madang i lukluk moa long en em long bringim ap imunaisasin, daunim sik bilong ol pikinini taim mama i karim, kamapim moa lain long lukautim mama i karim pikinini long rurel eria na go aut long givim marasin long lain i gat sik TB.

Moa long en tu em long kampim moa ples long testim ol lain long sik HIV na givim marasin long tu givim trening long ol lain long mekim wok long sait long helt na medikol.

## YWAM Medikol sip i kam bek long PNG



Piksa bilong nupela dentis sia insait long MV YWAM Medikal Sip. Foto: Frieda Sila Kana

YWAM Trening na Medikol Sip, WV YWAM PNG, i kamap long Pot Mosbi long dispela wik long selebretim 5-pela mun long wok insait long PNG long ol ples i stap longwe tru long ol haus sik na ol taun long Sauten Rijon na Huon Galp.

Dispela Trening na Medikol Sip i kam bek bihain long ol i stretim ol tupela nupela klinik na long ol ples bilong lukim ol siklain na helpim planti ol tausen pipel long ples long kisim dentis na long stretim ol ai.

YWAM Medikal Sip menesing dairekta, Ken Mulligan i tok, kam bilong MV YWAM PNG em i taim bilong PNG i amamas.

"Dispela ran bilong sip i makim narapela bikpela hap bilong wok bilong planti pipel long PNG, Australia na long olgeta hap bilong wol we ol i bin wetim longpela taim pinis. I gat planti pipel

husat i gat gutpela bel long givim helpim long mipela i kam inap long dispela taim long helpim planti tausen pipel insait long ol ples i stap longwe tru long bus bilong PNG." Mista Mulligan i tok.

Nupela dentis klinik bilong MV YWAM PNG na de taim klinik yunit i gat 4-pela dentis na tupela dokta long mekim wok operesen long wankain taim yet. Ol mobail klinik tim bai wokim ol praimer i helt ke na optometri klinik long ples. Spes long nupela klinik bai inap long kisim ol Papua Niugini dentis, optalmolojis, na ol sumatin dokta bilong stretim tit na ai long mekim wok ekspiriens bilong ol taim ol i wok wantaim ol YWAM Medikol Sip volantia.

Petron bilong PNG YWAM Medikal Sip, Sir Rabbie Namaliu i tok em i gat bikpela bel amamas long lukim MV YAWAM PNG i

kam bek long solwara na wara bilong ples stret.

"Tude i makim stat bilong nupela taim we mipela i gat moa samting i winim taim bipo. Mi gat bikpela bilip na hop olsem gutpela samting bai kamap long yia 2016," Sir Rabbie i tok.

"Mipela i bin bihainim wanpela gutpela rot long kisim sevis long MV YWAM PNG Trening na Medikol Sip long PNG. Em i no inap kamap sapos helpim bilong Nesenel Gavman wantaim ol provinsal gavman bilong Sauten Rijon na ol kopret sponsa bilong mipela na ol helpim i kam long Australia Eid na ol grasrut sapot. Em i gutpela tim wok!" Sir Rabbie i tok.

MV YWAM PNG bai statim wok bilong en long Galp, Westen, sentral, Milen Be na Oro na Morobe Provins long dispela wik Sarere 13 Februeri, taim em i lusim Pot Mosbi.



## Gutpela Helt Toksave - PMGH

**Fungal meningjaitis** - Fungel meningjaitis em i no save kamap planti tumas na em i no save kisim ol helti lain tumas.

Ol lain husat bodi banis bilong ol i no strong tumas olsem ol lain i gat sik binating bilong HIV/AIDS i stap long rot bilong kisim dispela kain sik Fungel meningjaitis. Em i no save kalap long narapela sikman i go long narapela. Nogat. Em i save kam long win long ol hap bilong ol fangi stap nabaut.

### Wanem kain lain bai isi long kisim dispela sik?

I gat ol stadi i soim olsem ol lain i no gat gutpela banis bilong bodi em isi long kisim dispela sik, ol lain i gat bagarap long splin o sampela kain sik we i save stap olgeta taim bai opim rot bilong wanpela man o meri bai kisim sik. Bikos sampela jem we i save kamapim meningjaitis em inap long kalap i go long narapela man sapos em i go klostu long wanpela sikman o sikmeri.

**Ol mak bilong Fangel meningjaitis** - Menin gijaitis bai hat log luksave long meningjaitis long stat bilong en bikos ol mak bilong ol em wankain tasol long taim wanpela man i kisim kus na em inap long kamap bikpela hariap. Sampela pipel ating bai pilim sampela sain olsem; skin hat, strongpela hetpen, nek i tait, pilim bel tanim, tanim o traut, ai raun na tingting i paul, i no laikim lait na nois, pilim slip na bodi i no strong, i no laikim kaikai, skin go yelo, skin ret o liklik solap, hap indai long sampela. Em ol sampela sain tasol i no olgeta lain bai pilim olsem.

### Ol bebi bai lukim sampela mak olsem:

Skin hat, traut, kra i nating, nating, i no dring susu gut, , skin i les.

### Bai yu mekim wanem sapos yu lukim dispela kain sain long wanpela bikpela man o meri o liklik bebi?

Namba wan samting em yu mas hariap kisim dispela man, meri o bebi i go long haus sik ol klinik sapos yu lukim ol dispela kain mak o sain yumi lukim antap. Baktiria meningjaitis em i wanpela birua na em inap kilim man.

**Rot bilong stopim** - Baktiria meningjaitis - Gutpela wei bilong stopim baktiriem meningjaitis em long kisim banis marasin o sut. I gat ol banis marasin i stap long pasim rot bilong tripela as bilong kamapim baktiria baktiriem meningjaitis. Kisim toksave long dokta bilong yu.

**Vairel meningjaitis** - I no gat banis marasin long pasim rot bilong vairel meningjaitis, tasol yu mas wasim han bilong yu gut, larim haus mas stap klin na no ken serim wanem samting i stap long maus bilong yu pinis. Em bai stopim dispela binatang long no ken go long narapela lain.

**Fangal meningjaitis** - I no gat banis marasin bilong dispela kain meningjaitis. Tasol yu ken pasim rot bilong Fangel meningjaitis long yu stap longwe long ol kain ples we yu bai isi long kisim dispela sik, kain olsem we ol pisin save pekpek.

Toksave: Yu mas wasim han olgeta taim bihain long yu go long toilet, stap longwe long ol man i snis o kus, na stap longwe long ol lain i gat sik. Lukim dokta long eben helt klini na wokim ol sekap long helt bilong yu.

## Kensa i kilim man kwik taim

### Charlpetson Koi i raitim

KENSA sik i no save wetim ol man long go long haus sik o long painim mani bilong ol long baim haus sik. Em i save go bikpela na kilim ol man taim ol i no go long haus sik hariap.

Long Papua Niugini, Sevikel kensa o kensa long bilum bilong karim pikinini em i wanpela bikpela sik we i kilim ol meri. Tasol, Helt Dipatmen i nogat luksave long dispela insait long helt plen bilong 2010-2020.

Senia Leksera long Sejeri na Konsalten Sejen, Dokta Arnold Waive, i mekim dispela toktok long Wol Kensa De taim ol i tingim dispela de long US Embasi long las wik Trinde.

Dokta Waive i tok em i lukim dispela sik i kilim planti pipel tasol Helt Dipatmen i nogat wanpela polisi bilong dispela na nogat mani bilong kensa.

Em i tok long Lae Angau Jenerel Haus sik ol i save yusim 2D Kobalt 60 masin we gav-

man bilong Australia i bin givim long 1974 tasol nau olgeta kantri long wol i yusim 3D Lina Ekselereta (LINAC).

Dokta Waive i tok dispela nupela masin we olgeta kantri i yusim em ol i baim long K2 milien tasol. Em i tok moa olsem dispela kensa fasiliti long Angau tu i gat 10-pela bed tasol we 5-pela ol sik lain save slip na narapela ol waslain save yusim.

Long wankain taim, Het Sejen bilong Pot Mosbi Jenerel Haus sik, Dokta Charles Paki Molumi i tok namba wan as bilong maus kensa em kaikai buai wantaim kambang, dring bia na smuk.

Dokta Molumi i tok em i gutpela long banisim yumi yet na noken kaikai buai, smuk na dring bia. Dispela bai banisim yumi long sik kensa i bagarapim bodi.

Em i lukim planti liklik pikinini i stat pinis long kaikai buai we i no gutpela bikos taim ol i stap long 30 krismas bai kensa i kilim ol bikos kensa i save kisim olsem 10-pela krismas long gro bikpela.

# CIC Seketeri em meri

**WANPELA yangpela mama i kamap kampani seketeri bilong Kopi Industri Kopresen (CIC).**

Wilma Banake-Agusave husat i gat 33 krismas na tupela pikinini i wanpela loya na i bin stat wok wantaim CIC olsem nupela kampani seketeri long Januəri 29, 2016.

Misis Banake-Agusave i gat bikpela ekspiens long wok loya bikos em i bin

wok 8-pela krismas wantaim Pablik Solisitas opis na Solisita Jenerel opis olsem wanpela loya.

Bipo em i joinim CIC, em i bin wok olsem Prinsipel Ligel Opisa wantaim Opis bilong Solisita Jenerel long Goroka, Isten Hailans provins.

Ekting Sif Seketeri bilong CIC, Charles Dambui, i tok CIC i amamas long meri olsem Wilam wantaim bikpela save na

ekspiens i go wok wantaim ol.

Em i askim strong ol woklain bilong CIC long givim gutpela sapot bilong ol long Wilma taim em i wok long sindaun gut long nupwela wok bilong em.

Wilma i gat Basela ov Lo digri long Yunivesiti bilong PNG we em i bin greduet long en long yia 2005.

Wilma i kisim ples bilong Sally Maladina husat i bin risain long dispela wok.

## Embasesa bilong ol meri i raun nau long PNG

WANPELA bikmeri bilong Australia husat i lukautim eria bilong ol meri na yangpela gels long Indo-Pasifik rijon i stap nau long PNG long strongim wok bilong ol meri long dispela kantri.

Natash Stott-Despoja AM i Embasesa bilong ol Meri na Gels long hai level edvokesi long promotim ol polisi bilong gavman bilong Australia i karamapim jenda ikwaliti, na strongim ol meri long sosel, politikel na ikononik saitlong Indo-Pasifik rijon,

Ol i bin makim em long mekim dispela wok long Desember 2013. Em i statim na kamap Siapesen long Our Watch (em Faundesen long stopim vailens egesim ol meri na ol pikinini bilong ol).

Em i save wok wantaim ol foren Gavman, ol intansenenel ogenaisesen na sivil sosaiti long sapotim ol wok bilong pinisim vailens egesim na trefikim olo meri na gels, promoting gutpela helt na skul bilong ol meri, lukautim ol meri na gel long ol

kantri na ples we i gat hevi na wo long en, bildim pis, rausim pasin bilong rabisim ol meri na strongim ol meri long go insait long lidasip posisen na wokim disisen.

Em i save raun planti long Indo-Pasifik rijon long strongim ol meri long ol eria antap.

Mis Stott-Despoja i bin pastaim seneta o memba bilong Saut Australia (1995-2008) na pastaim lida bilong Demokrets long Australia. Em i wokim rekot olsem yangpela meri long go insait long Federel Palamen bilong Australia na tu, long wok olsem Demokret Seneta long histori bilong pati.

Long wokabaut bilong em i kam long PNG, em i raun long Mosbi na Atonomas Bogenvil Rijon long bung na toktok wantaim meri na ol sapota bilong ol meri, na long ol skul tu.

Long Tunde dispela wik, Mis Despoja i bin bung wantaim tripela meri long Palamen na tu long Caritas Gels

Sekonderi skul.

Long aste, em i bin go long Buka we em bai lukim lons bilong Bogenvil Wimen Fed-

eresen opis, raun i go long Hutzena Sekonderi na bihain, toktok wantaim ol midia long Bogenvil.



**STRONGPELA MAUSMERI BILONG OL MERI:**  
Embasesa Stott Despoja

## Raun lukim ol meri na pikinini:



**OIL SEARCH:** Ol meri Oil Search i sanap wantaim sampela bos lain bilong long nupela Sir Manasupe Haus long Waigani. Dispela ol meri tu lisave mekim bikpela wok long helpim Oil Search long kamapim sampela nupela bilding long Pot Mosbi. Dispela nupela Sir Manasupe Haus em Oil Search i putim mani long mekim kamap nupela gen. PRL tu ol i bin putim mani long mekim kamap bikpela na wol klas ragbi pilai graun. *Poto Nicky Bernard.*



**TENKYU BOS MAN:** Ol wok meri bilong Sir Manasupe taim em bin stap Seketeri bilong Gavman. Sir Manasupe bai lusim wok long dispela mun long wanem em gat sik na em yet i laik stap malolo. Dispela ol wok meri bilong em i sanap klostu long em long wilsia bilong em long taim ol i opim nupela bilding long Waigani, bipo ol i save kolim long painapel bilding. Nau Praim Minista Peter O'Neill i givim nupela nem long em long gutpela wokwe Sir Manasupe i mekim long tripela tem olgeta. *Poto Nicky Bernard.*

## “Save na mekim”

*I kam long liklik buk, Stori na Wok,  
Elizabeth Cox i raitima*

## Gaden Kaikai bilong Famili Bilong Yumi

**TOKSAVE:** I gutpela sapos olgeta mama i tingting planti long gaden bilong famili bilong ol yet. Kaikai em i as bilong strong bilong famili.

Planti long yumi i no gat mani. Planti ples i no gat stua bilong salim kaikai. Na tu planti stua kaikai ol i rabis kaikai tasol, na i westim mani bilong yumi. Na long dispela taim, i gat planti trabel long gaden kaikai insait long ples.

Planti man na pikinini i lusim ples na raun long olsem na wok bilong ol long klinim bus, na helpim ol meri i no ran gut. Planti ples i save tingting tumas long wokim bisnis na i no wok tumas long ol gaden kaikai bilong ol. Wanpela bikpela asua bilong planti ples i olsem. Ol i save yusim ol gutpela graun we ples stret, na graun i gat gris long planim ol kes krop bilong wokim bisnis olsem kopi, kokonas o raba samting. Olsem na ol i lusim ol rabis graun, ol maunten na graun nogut long ol mama long planim kaikai.

Gaden bisnis i stap klostu long ples na gaden kaikai i stap longwe. Em i wanem kain pasin? Yumi man inap long kaikai kopi, kakao o raba? Prais bilong ol bisnis i save stap antap olgeta taim? Long planti ples yu ken lukim papamama i save wok hat tumas long “bisnis” gaden olsem na taim i sot long tingting long planti kaikai. Na tu bisnis i pasim bikpela graun na spes i sot pinis long planim kaikai gaden.

Dispela gaden kaikai i mas stap klostu long haus o ples we yu ken bosim gut. Nogut pik o narapela man i bagarapim. Sapos yu wokim gutpela gaden kaikai klostu long haus, bai yu lukluk long en olgeta taim, na tingting long wok, na kukim gutpela kaikai. Maski sapos yu bagarap long wok o bikpela ren i kam, kumu bin na kainkain gutpela prut na samting i stap na yu ken kaikai gut olgeta de.

Wokim gutpela gaden kaikai, na kukim gutpela kaikai em i wok tru bilong yumi ol yangpela meri na ol mama. Sapos yumi wok gut bai yumi i gat gutpela famili, na ol papa na pikinini i amamas tru long yumi.

## Zika binatang kamapim hevi long ol bel mama ...karim ol liklik het pikinini

Moa long 3,100 bel mama long kantri Kolombia insait long Saut Amerika i gat binatang bilong Zika vairas we moskito i save karim na givim long ol man em i kaikaim. OL ripot i tok Presiden bilong Kolombia, Juan Manuel Santok i tok dispela sik i wok long kamap nau long planti hap bilong ol kantri long Amerika rijon.

Kantri Brazil nau i mekim ol wok painim long link o bris namel Zika infksen na moa long 4,000 keis bilong “maikro-sefahali, em ol bebi mama i karim wantaim liklik het we i ken kamapim hevi long gro na tingting bilong ol.

Ol risets lain i painim olsem 7 keis bilong Zika infksen em i gat dispela sik bilong liklik het.

I kam inap nau, i no gat vaksin o banis sut bilong Zika. Ol ripot i tok 80 pe sen long ol lain i gat Zika i no save soim sain.

Moa long 26,000 pipel i gat binatang bilong Zikas long Kolombia na 3,177 em ol bel mama.

# Wok bung wantaim: Naru

TUPELA siois grup i kisim askim long stretim ol hevi na wari namel long ol na bung wantaim long bildim nupela Luteran Sios yunivesiti.

Morobe Gavana, Kelly Naru i wokim dispela singaut namel long ol tok politiks long dispela yunivesiti na fanding we i wok long kamap nau yet long midia.

Na ol ripot long dispela wik, Luteran Yunivesiti we wok i go het long sanapim, i bin kisim planti mani pinis, tasol ol woik divelopmen long graun na ol infrastraksa olsem ol bilding i no kam gut yet long soim mani we ol i kisim pinis long ol wok.

Tu, Mista Naru i wokim toktok bihain long disisen we ELC-PNG i bin wokim long sinod bilong ol long Heldsbach, Finsafen klostu long pinis bilong las mun, we ol i bin pasim tok olsem ol i mas statim wanpela institut bilong haia lening long wok i go long sanapim nupela Luteran Yunivesiti.

Mista Naru i tok dispela em raiit long bihain bikos em i rikwaiamen bilong Opis

bilong Haia Edukesen, Saiens na Teknoloji we i wok wantaim ELC-PNG komiiti ol i makim long lukkautim dispela wok.

Long ol ripot, Mista Naru i tok manimak long K7.5 milien em ol i yusim long sanapim ol wok infrastraksa olsem ol skul bilding, na em i askim komiiti i go pas long dispela wok long tok klia long dispela.

Mista Naru i tok kirapim Luteran Institut ov Haia Lening (LIHL) em i disisen bilong ELC-PNG sinod na ol i mas toksave long dispela i go long narapela (Pato komiti) komiti na luksave i ken stap long ol i wok bung gut long gutpela bilong sios na eduksen.

Long sinod, Het Bisop bilong Gutnius Luteran Sios Bisop David Piso i bin tok i masa gat wanpela sios tasol .Nau tupela sios i stap, wanpela em Evanjelikel Luteran Sios bilong PNG (ELC-PNG) Gutnius Luteran Sios (GLC) we i gat tupela hetman tu bilong ol.

Em i tok tupela sios i mas yunait na karimaut wok bilong ol long sevim Bikman na ol pipel.

# Blesing pen lotu long Holi Famili Sios

HOLI Famili Angliken Sios peris long Hohola i bin holim blesing bilong pen lotu las wik Sande long strongim ol nius manmeri long wok bilong ol .

Dispela em i namba tu taim we wankain lotu i kamap long dispela sios, wantaim namba wan i bin kamap long las yia.

Peris pris, Pater John Dubabagi i bin go pas long dispela lotu sevis i bin strongim ol nius ripota long karimaut wok bilong ol wantaim bilip, hop na laik pasin.

Em i bin tokim ol lain i bin kamap long dispela lotu sevis na ol i blesim tu ol pen bilong ol long go long lotu na putim Bikman pas-taim long laip bilong ol olgeta de.

As tingting long blesim pen em long helpim long strongim ol nius ripota long wok bilong ol.

Pater John i bin tok wok bilong midia em long givim aut infomesen o nius i go aut na tu, ol nius ripota i save mekim bikpela wok insait long kantri.

# Gavman i mas gat rekot bilong ol pipel i go wok ovasis

## ...Kam bek na kontribiut long wok divelopmen

GAVMAN i mas gat rekot na lista long ol PNG lain i mekim wok long ol narapela kantri olsem ol misineri na ol volantia.

Dispela em bikos ol dispela lain i save kisim ol gutpela save na ekspiens na kam bek long kontribiut bek long dispela kantri.

Oposisen lida, Don Polye i mekim dispela toktok bihain long wanpela Katolik Sister i bin lusim kantri las wik na go long kantri Ethiopia long mekim wok misineri long hap.

Sister Hermina bai mekim wok misineri

long Ethiopia we i gat populesen i wionim 90 milien pipel.

Em bai wok wantaim Misineris ov Sariti kongrigesen we Mada Teresa i bin kirapim. Ol i gat ol refuji hom long kAddis Ababa em kapitel bilong Ethiopia.

Mista Polye i tok i moabeta long kantri i mekim samting long ol sans long ol misineri na volunteri misin ovasis.

Em i tok gavman i wok long givim tu ovasis helpim we ol misineri i wokim tu na i moabeta long gat ol rekot long dispela.

# Tupela Yuniatet Sios long Westen provins kisim mani helpim

OL sios memba bilong tupela Yunaited Sios kongrikesen long Westen provins bai gat gutpela sios bilding long wokim sios sevis na tok tenkyu i go long Gavana bilong ol, Ati Wabiro.

I no long taim i go pinis, McFarlane Memorial Sios long Mawata Viles long Kiwai Lokol Level Gavman Kaunsel long Saut Flai i bin kisim K60,00 sekmani long stretim gut sios bilding na haus bilong pasto.

Dispela em i namba wan sios we Yunaite Sios i bin kirapim long 1871 insait long

Westen Provins, na bihain, sios i bin go aut long ol narapela hap bilong ailan na provins.

Narapela sekmani em ol i bin givim i go long Rouku Yunaitet Sios long Morehead seket. Manimak inap long K200,000.

Kayama Sinba em namba tu seketeri bilong Gavana Wabiro, i tok provinsel gavman aninit long stia bilong Gavana Wabiro i bilip strong long wok patna wantaim sios na gavman long sevim ol pipel na olsem, ol i givim dispela mani helpim i go long tupela sios long karimaut ol wok infrastraksa bilong ol.



**KWAIA:** Ol Katokil mama kwaia i givim gutpela nek bilong ol insait long wanpela sios selebren insait long Nesenel Kapoitel Distrik.



**NAISPELA BILAS:** Tupela yangpela pikinini meri i putim naispela bilas na stap insait long wanpela sios selebren.



**TAIM BILONG KOMYUNIO:** Bisop Alphonse Kiapseni bilong Kavieng Manus Katolik Daiosia i givim komyunio insait long wanpela siois seremoni.



**KOMENTRI**

# Nupela yia, tasol i no gat nupela senis

**NUPELA** yia i stat nau na i gat planti moa salens i stap long wok bilong ol gavman dipatmen long Mosbi na long wan wan provins insait long kantri. Praim Minista i mekim sampela senis tu long sampela minista bilong em bikos em i laik strongim wok bilong ol dipatmen. Na long dispela wik, gavman i tokaut tu long nupela sif seketeri bilong gavman. Wok bilong sif seketeri em i bikpela samting bikos em i namba wan pablik sevan bilong kantri na em i mas bosim gut olgeta gavman dipatmen na lukim olsem olgeta i mekim stret wok bilong ol long sevim ol pipel bilong kantri.

Ol dispela bikpela disisen bilong gavman wantaim bikpela bung bilong ol gavman dipatmen long dispela mun tu, em i mak bilong statim gut ol wok bilong bringim

gutpela sevis long kantri. Long dispela taim tu, prais bilong ol kain samting olsem gol, kopa, oil na kopa i no gutpela tumas long wol maket na gavman i kisim taim bikos mani kantri i save kisim long ol dispela samting i no gutpela tumas. I gat bikpela wari nau olsem gavman bai i no inap long bungim mak bilong 2016 baset na kantri bai i sot long mani.

Las wik, minista i bosim ol bisnis han bilong gavman i tokaut olsem mani mak bilong ol dispela bisnis bilong gavman inap long mak bilong K20 bilien. Dispela em i bikpela mani tru long taim yumi bungim ol dispela bisnis wantaim. Tasol sapos yumi brukim wan wan na askim wanpela independen grup long glasim na tokaut long mani mak bilong wan wan bisnis, ating bai yumi lukim olsem

mak bai pundaun.

Planti bilong ol dispela bikpela bisnis han bilong gavman i strong yet long baset mani gavman i save givim ol long wan wan yia. Bikpela mani i mas lus long stretim gen ol masin na arapela samting bilong wok. Wanpela gutpela eksampel em PNG Pawa na Telikom PNG. Ol haus na masin na wokman na ol speselis ikwipmen i sot tru. I mas gat bikpela moa mani i go insait long stretim ol na bihain long sampela yia bai ol i ken wok gut na kamapim sampela profit bilong gavman na givim gutpela sevis i go long ol pipel bilong Papua Niugini.

Wok bilong lukautim ol bisnis han bilong gavman em i no isi wok. Olsem na yumi amamas i gat nupela minista husat bai skruim wok i go moa yet. Tasol

long wankain taim, minista i mas opim ai na yau long ol wari bilong ol wokman bilong ol dispela bisnis bilong gavman. Ol teknisen bilong PNG Pawa na Telikom PNG i lapun nau na i mas gat ol nupela lain i kisim trening long mekim wok bilong bihain taim. Ol telipon i bagarap na i no gat ol teknisen i raun long stretim ol len lain moa. Ating ol i laik ol kastoma i yusim mobail fon tasol o? Yumi ken mekim wankain tok long ol lain bilong PNG Pawa. Planti ol pawa lain i bagarap, na ol pipel i wok long stilim pawa tasol i no gat ol wokman i raun long sekap na stopim dispela kain pasin.

Yumi luksave olsem gavman wanpela tasol i no inap long mekim olgeta wok. Em i gat plen bilong pablik/praivet patnasip we gavman i wok bung wantaim ol

praivet kampani long kamapim wok. Ating i mas gat pablik tenda long ol wok bilong stretim telipon na ol pawa lain aninit long dispela program bilong gavman. Mekim olsem bai gavman i no inap lusim bikpela mani bilong mekim mentenens wok. Na long wankain taim, bai yumi givim wok long planti moa ol manmeri husat i kisim trening long mekim ol dispela kain wok.

Nupela sif seketeri i tokaut pinis olsem pablik sevis i bikpela tumas na i slek long mekim ol wok bilong en. Orait, wanpela rot bilong katim daun namba bilong ol pabsik sevan em long givim wok i go long praivet kampani long mekim. Gavman bai sevim bikpela mani, na bai givim profesenel sevis i go long ol pipel bilong Papua Niugini.

# Ol pikinini i mas kisim edukesen long taim

**Frieda Sila Kana i raitim**

BIKPELA tingting bilong Treid Pasifik Limited, kampani we i helpim Edukesen Dipatmen inap long 30 yia nau long givim aut ol skul matiriel em, ol pikinini i mas kisim edukesen na tu ol i mas stat long taim stret na i no ken bihain.

Jeneral Menesa bilong Treid Pasifik, Wilson David i tok, long dispela wik olsem ol papa

mama bai i no ken baim skul samting bilong ol pikinini, na gavman bai baim, tasol ol pikinini i mas statim skul long taim wantaim ol matiriel bilong ol yet na ol tisa tu.

Tasol i luk olsem long planti skul nau, ol sumatin na tisa i statim skul nating na i no gat ol skul samting long yusim.

Wanpela senia menesa bilong Treid Pasifik long Polisi divelopmen, Weibi Moide i tok planti skul long ol rurel eria i no gat wanpela samting bilong tisa na ol sumatin i skul long en.

Em i tok long taim ol i bin go aut long givim ol skul samting, olgeta taim ol i save lukim ol pikinini na ol pipel long komyuniti i save holim pas long ol mekpas bilong sumatin kit na ol i save kra i na tok tenkyu bikos i no gat samting olsem i save kamap long bipo.

Long las yia, Treid Pasifik Ltd i bin givim akwital ripot i go long Edukesen Dipatmen long Komoditi Komponen bilong Tuisen Fi Fri Edukesen (TFFE) na planti pipel i bin ting olsem gavman bai go het long baim moa samting bilong dispela yia 2016 o givim kontrak gen long ol long mekim wankain samting. Tasol dispela i no kamap yet olsem na kampani i lukim olsem ol i gat moa samting i stap bilong kamapim ol matiriel na ol i toktok wantaim 15 praimer na elementri skul insait long Nesenel Kepital Distrik long ol i patnasip wantaim long bringim ol buk na ol narapela matiriel bilong skul i go long ol sumatin na tisa hariap.

Tripela skul i sainim kontrak pinis em long Ted Diro Praimeri na Elementri Skul, Wod Strip



**Mista Wilson David, Jeneral Menesa bilong Treid Pasifik Ltd, i soim wanpela sumatin na tisa de daira buk bilong rekotim olgeta wok we sumatin bai go soim long papa na papa long wan wan de.**  
Poto: Frieda Sila Kana

Praimeri na Elementri na Sevese Morea Praimeri na Elementri Skul.

Ted Diro i kisim pinis olgeta skul matiriel bilong ol long Mande dispela wik na Wod Strip bai kisim bilong ol tude na Sevese Morea bai kisim bilong ol long tumora. Ol dispela skul kit em inap long wanpela sumatin i yusim insait long Tem 1 bilong skul.

Ol narapela 9-pela skul bai kisim bilong ol long Tem 2 na tumora bai ol het tisa i bung wantaim Mista David na toktok long kontrak bilong ol.

Mista David i tok olsem kos bilong wan wan sumatin pek em, K100 long wanpela elementri sumatin, K300 long wanpela Praimeri na K800 long wanpela haikul

sumatin long wanpela yia.

Treid Pasifik Ltd i kamapim wanpela gutpela sistem bilong sekim wanem kain samting i go long skul bilong tisa na sumatin i yusim. Ol i gat monitarim tul na sistem i stap pinis. Ating em i moa beta, gavman i hariap long putim mani long ol skul bai ol inap long baim ol dispela matiriel bilong ol sumatin.

Tasol Mista David i tok moa olsem ol matiriel em ol i save prinim na stretim olsem na wokim kontrak hariap em bai gutpela tasol i luk olsem gavman i leit nau long bungim tem 1 skul taim.

Ol 15 skul long NCD i wanbel olsem ol bai baim kos bilong ol matiriel taim gavman i baim ol TFF mani bilong ol klostu taim nau.



Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
**Telephone: (675) 325 2500**  
**Fax: (675) 325 2579**  
**Email: editorial@wantok.com.pg**  
**Websait: www.wantokniuspepa.com**  
**Pe bilong wanpela yia, 52 niuspepa**

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

**General Manager**  
Elizabeth Konga

**Editor**  
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Opening seremoni bilong XV Pasifik Gems i bin nais tru

Long 3-kilok apinun ples bilong sindaun i no gat man.

Wan wan lain tasol i stretim ol samting.

Ples i luk klin, nais na redi.

Ol man i wok long set ap.

Wan wan manmeri i wok long kisim ples bilong sindaun

Planti manmeri i kam insait long 4-kilok apinun.

Ol manmeri i no isi, ol i kam pulapim stedium

### Aja Potabe i raitim

MI bin tingting planti na askim mi yet. Opisal Opening Seremoni bilong bilong XV Pasifik Gems long Pot Mosbi las yia bai kamap olsem wanem stret.

Dispela taim planti ol veniu na ol arapela samting bilong gems i no bin pinis gut. Na mi bin ting olsem opening seremoni bai no inap kamap gut tasol dispela tingting bilong mi i bin ron-awe taim gutpela na kalaful so i bin kamap long tok welkam long ol pilaia na tu long opim Pasfik Gems.

I no gat wanpela no gut samting i bin kamap long namba wan de na nait bilong dispela bikpela gems taim opisal opening seremoni i bin kamap long Sir John Guise Stedim long Pot Mosbi.

Mi bin ting PNG bai no inap holim dispela gems gut bikos dispela taim planti ol samting bilong ranim dispela gems i no bin pinis gut.

Planti manmeri i bin mekim kain kain toktok na i no bin bilip long strong bilong PNG long holim gut dispela namba 15 Pasifik Gems.

Mi yet i bin ting planti samting bai no inap kamap gut. Mi bin ting PNG bai kisim bikpela sem taim sampela samting i no kamap gut long opening seremoni ol long taim bilong gems.

Tasol no gat. Dispela olgeta tingting no gut bilong mi i bin lus taim opening seremoni i bin kamap kalaful na nais tumas.

Mi ken tingim bek olgeta gutpela memori bilong dispela apinun na nait taim opening seremoni bilong gems i bin kamap.

Planti biknem pilai manmeri bilong Pasifik rijon i bin kam stap long dispela nait long opim ol gems na statim pilai bilong ol.

Ol poto i soim wanem samting i bin kamap long dispela opening seremoni apinun na nait.



Manmeri isi isi pulapim stedium long 5-kilok apinun.



Long 4-klok apinun, ol manmeri i wok long kam in-sait long Sir John Guise Stadium long kisim ples na sindaun gut long lukim dispela bikpela Opisal Opening Seremoni bilong Pasifik Gems.  
Kain kain paia wok i bin stat long 7 klok nait. Ol kainkain pasin kalsa na tumbuna bilong PNG i bin danis na soim stail long dispela taim.  
Wan wan tim i kam wantaim plak na yunifom bilong ol. Kainkain kala i mekim opening seremoni nait i kam gut tru.



Soim trupela kala bilong PNG.



Kainkain paia wok i bin kamap.



Bikpela paia na smok i kirap



Manmeri i amamas long pasin yuniti bilong wan solwara



Tim PNG bagarapim ples



Tim Fiji i kam soim kala.

# Ron wantaim Wantok...

**WIKEN em taim bilong malolo na taim bilong raun long ol famili o taim bilong go pilai long taun kompetisen we save kamap long ol pilai graun.**

Wantok Niuspepa poto man i raun long sampela bikpela pilai graun long Pot Mosbi long kisim ol poto bilong ol spot na tu kisim piksa bilong ol manmeri na pikinini husat save raun long ol pilai graun na lukim pilai na amamas wantaim ol poro.



Lukim ol dispela ol poto long sampela bilong ol pilai graun na rot insait long pilai graun. Tru tru Pasifik Gem i senisim sampela pilai graun bilong Mosbi na mekim ol manmeri na pikinini long Mosbi tu i senisim sampela kain pasin bilong ol.

No ken kirap nogut long lukim poto bilong yu long Raun Wantaim Wantok pes. Putim ai long kamera man bilong Wantok taim em raun long wiken long pilai graun na askim em long stap insait long Raun Wantaim Wantok.






# Em nau! Ol pikinini i ken painim rot i go long ples wantaim Wantok kru...



EM ORAIT



EM NOGUT

## Stori bilong tumbuna

### Dok i kisim paia lait i go long Siane

**B**ipo bipo tru long taim bilong tumbuna, wanpela man em tumbuna bilong ol lain Siane nem bilong em Mateka. Em i stap wantaim wanpela dok man bilong em long ston haus na dok i save was gut long lapun man. Dispela taim ol i no gat paia lait olsem na ol i save kaikai nupela kaikai tasol. Wanpela taim, dok i go antap long bikpela maunten Elimbrana i sindaun long ston na lukluk i go i kam long lukim ol simuk na paia bai kirap.

Em i lukim wanpela simuk i kirap long Om Kolai long saut Simbu na em i ting long go long dispela tasol em i longwe tumas olsem na apinun pinis na em i kam daun long haus. Na taim lapun man i slip i stap, dok i sigirapim lek bilong en na i soim em olsem em bai go aut long kisim paia lait. Dok i putim wanpela paiawut long maus i soim lapun i paul long sain dok i wokim na em i slip gen.

Long nait yet, dok i stat long wokabout i go i go yet na em i tulait long ples Om Kolai long saut Simbu na dok i lukim dispela simuk long bus na i go antap na i lukim wanpela meri i stap, na dok i go na i pailai pani na amamas wantaim em. Meri i lukim nupela pes dok na i amamas long lukautim em na em i givim kaikai na tupela i slip. Moning tru dok i kirap na i putim wanpela paia wut meri i wokim paia long. Em i kam ausait na meri ya i sori long dok i wokim dispela na i laik bihainim em. Em i kirap kisim bilum na tupela i kam olgeta long wara Wagi na i kam yet long ples. Dok i kisim em i go long haus bilong en tupela lapun na lapun i karai nogut tru long tupela na ol i wokim namba wan paia long Siane na lapun i maritim meri na tupela i stap.


Olsem na long ples Siane, yu i no inap paitim dok. Em i tambu tru na taim yu paitim dok, paia lait long haus bilong yu bai truru dai na yu painim paia lait yet.

Ol wod lista:

- |                  |                  |
|------------------|------------------|
| <b>EKSOSPAIP</b> | <b>HARIM</b>     |
| <b>ENSIN</b>     | <b>HAMBAKMAN</b> |
| <b>EMTUPELA</b>  | <b>IMIGRESEN</b> |
| <b>FONDE</b>     | <b>ILEKSEN</b>   |
| <b>FLET</b>      | <b>KAMAN</b>     |
| <b>FIKUS</b>     | <b>KABIS</b>     |
| <b>GAVMAN</b>    | <b>KLOSTU</b>    |
| <b>GOAN</b>      | <b>LONSIM</b>    |
| <b>GIAMAN</b>    | <b>LASPELA</b>   |
| <b>GREDUET</b>   | <b>MEYA</b>      |
| <b>HEVEN</b>     | <b>MANGRO</b>    |

N G E W F K E E I S I S E B L L S C O H A O O V O  
V S P U L S X E D E L D R T K C C E G V S F F E S  
I R D O R R Z N G J I R Q S I P T C I R O N P Z V  
S V S R K Q P E F Q X A Q Z T K H A R I M G Y R L  
T T F K N A I F I U O M C S L O G E X L E I R O C  
T Y E P O R B E K B B I H E I O W I V A N K A L Q  
J G Z T C Y A I U H A M B A K M A N A E C O C J D  
E I S P O K L O S T U G R E D U E T S M N L R O S  
R A Z R V T L T E G A A A X D I K K C F A A D X E  
R H I C X O O K S I M I G R E S E N Z R F N N T C  
E T H A E G N K A S D L D M A L T E A H R O E H O  
H F L E T A S R W V O A P Y I P B W P O I I N D P  
P E R A L V I N S E K S O S P A I P X O K E G D M  
H L D B R M M A M M T P M G C A K M R N A E L T E  
D E T E N A H F S T A E C G R S M A E S M S O C Y  
B N Z J S N E F T U B L G D G T A N P E A R V R A  
R H A E B V F E W P O A F D N E N G O A N E E Z F  
B K P V R E D K Y E I A I E A R E R E T P A E X F  
M S A E R H R P B L C Q O P L A P O L T E M E P E  
V S R E N S I N I A U S T S S S R K N F S H E G X

Ansa bilong Wod Pilai isu 2160





# TOK PISIN NEWS

from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## Buai kensa long PNG



Buai long maket long PNG. *Ol foto: ABC*

**Caroline Tiriman i raitim**  
**OL Helt atoriti long Papua Niugini i tok ol i gat bikpela wok tru long daunim wari bilong kensa long maus bihainim pasin bilong kaikai buai.**

Dokta Gregory Maino em Sif Edvaisa bilong Oral Helt long Papua Niugini i tokaut long dispela samting long taim kantri i makim Wol Kensa De.

Sampela ripot bilong Helt Dipatmen i tok moa long 25,000 pipel i save dai ol-

geta yia long kensa biong maus, na dispela namba i wok long go antap.

Sampela lokal dokta long PNG i tok dispela kain sik i wok long go antap tru na ol i no gat ol gutpela sevis long helpim ol pipel i gat kensa long maus.

Dokta Gregory Maino husat i Sif Edvaisa bilong Oral Helt long Papua Niugini i tok bikpela wari em olsem ol pipel nau i save yusim buai olsem bisnis na dispela i no helpim wok bilong daunim dispela kain sik.

## Solomon Ailan i kontrolim sik leprosi



Solomon Ailans 2016 World Leprosi De grup.

**Sam Seke i raitim**  
BIKPELA wok i go het nau long kontrolim sik leprosi long kantri.

Mak bilong sik leprosi long Solomon Ailan i stap aninit long mak we Yunaitet Nesens i tok long ol wan wan kantri long wol i no ken abrusim.

Dispela mak em i wanpela leprosi keis namel long 10 tausen populesen.

Solomon Ailan i bin pin-

isim leprosi long 1995, tasol sik ya i stat long kamap gen long 2004.

Nesanel Leprosi Edvoketa long Ministri bilong Helt, Oliver Merpirla i tok long 2014 ol i lukim 48 keis, na long 2015 ol i rekodim 31 keis olgeta hap bilong kantri.

Em i tok ol helt atoriti i wari long dispela na i kamapim ol program long stopim sik leprosi long Solomon Ailan.

## Bipo refuji sori long ol Australian asailam sika



Haus ol asailam sika i slip longen long Nauru.

**Caroline Tiriman i raitim**  
WANPELA refuji bipo bilong Wes Papua I tok em i wari na sori tru long ol asailam sika em Australia i laik salim ol I go bek long Nauru long wanem, planti long ol I wok long ronawe long ol bikpela wari

bilong politik long ol kantri bilong ol.

Ronnie Kareni, husat I bin lusim moa long 10-pela yia long ol refuji kemp long Wes Sepik na Westen provins long Papua New Guinea i mekim displa toktok bihain long Hai Kot bilong Australia

I bin tok no laik long wanpela askim olsem ol ditensen senta long ol nara-pela kantri I no bin bihainim loa bilong Australia.

Dispela tingting bilong Hai Kot i min olsem 270 ol asailam sika i stap long Australia I mas go bek long Nauru.

Moa long 100 long ol dispela pipel em ol pikinini na bebi.

Aste planti pipel tru long ol stet bilong Australia I bin mekim ol protes long askim federel gavman long larim ol asailam sika i stap bek long Australia.

## Ol meri Solomon na pikinini i nidim sekyuriti



Ol meri blong Gizo ailan long Westen Provins.

**Sam Seke i raitim**

PRESIDEN bilong Westen Provinsal Kaunsil ov Women long Solomon Ailan i tok, ol nesanel lida i mas tingting gut long ol polisi ol i kamapim long sait long pis na sekyuriti bilong kantri.

Wendy Solomon i mekim dispela toktok taim gavman i peim pinis moa long tri milen dola long ol foma militen bilong Malaita na bai givim wankain tu long ol eks kombatan o paitman bilong Guadalcanal.

Dispela i bikpela isu long Solomon Ailan we sampela i sapotim rihabilitesen mani long ol foma militen na sam-

pela i egensim.

Solomon Ailan i bin gat pait namel long ol Guadalcanal na Malaita stat long 1998. Ol i sainim Townsville Peace Agrimen long yia 2000, tasol pait i go het yet inap RAMSI i bin go helpim long 2003.

Misis Solomon i tok ol meri na pikinini bilong Westen na Choiseul provins tu i bin bungim bikpela hevi long taim bilong pait.

Tasol Misis Solomon i tok, rihabilitesen mani bai pinis nating na wanem samting ol i nidim nau em ol gutpela disisen we bai mekim laip bilong ol meri na pikinini long komyuniti i stap wantaim bel isi.

## Vanuatu Unity for Change

**Sam Seke i raitim**

WANPELA politikel grup i kam aut strong long em bai ranim nupela gavman long Vanuatu.

Unity for Change grup we i luk olsem bai fomim nupela gavman bilong Vanuatu bai go stap long liklik ailan bilong Pele long Not Efate long lukim olsem grup bilong ol i no bru bruk.

Dispela grup bilong 36 nupela memba bilong palamen i bin sainim wanpela agrimen long fomim nupela gavman bihain long snap ileksen

long Janueri 22.

Dispela Unity for Change i gat 11 grup insait em Vanua'aku Pati we Joe Natuman nau i palamen lida bilong en, na Graon Mo Jastis Pati bilong Ralph Regenvanu na Praim Minista bipo, Ham lini i stap tu insait long dispela grup.

Niusman Hilaire Bule i ripot olsem taim ol i stap long Pele Ailan nau bai ol i toktok long lidasip bilong ol.

Em i tok ol bai stap long Pele Ailan i go inap long nupela palamen i holim namba wan miting long namba 11 Febueri.

## PNG Events i westim mani

**Caroline Tiriman i raitim**

GAVMAN bilong Papua New Guinea I tokaut pinis olsem em i redi nau long ol bikpela bung o intenesenel iven em kantri bai lukautim long dispela yia.

Tasol sampela NGO long PNG i tokaut olsem ol planti milien kina gavman bai putim long ol kain kain even long dispela yia em bai west nating.

Ol i wari olsem mani em gavman bai lusim long ol dispela bung i mas go long ol

wok bilong helpim ol pipel long ol kain samting olsem edukesen, helt, transpot na tu long helpim ol pipel long taim bilong draut.

Ol dispela bung bai stat wantaim bikpela miting bilong ol lida bilong African, Karibbean na Pasifik (ACP) long mun Me, na ol lida bilong 80 kantri long ACP bai stap long en.

Narapela bikpela bung em FIFA women's anda-20 Wol Kap em 16 kantri bai stap long en long mun Novemba long Pot Mosbi.

## Singsing bilong yangpela Solomon gel i pulim moa long 12 milien pipel



Rosie Delmah, yangpela gel bilong Solomon Ailan i gat hit musik wantaim Conkarah.

**Sam Seke i raitim**

EM nau Rosie Delmah husat i singsing wantaim rege singa bilong Jamaica, Conkarah husat i bin go singsing tu long PNG na Vanuatu.

Karl Bouro, video produsa husat i stretim singsing bilong Rosie Delmah na Conkarah i tok singsing bilong Adele tupela i bin

singim, "Hello" i nau pulim moa long 12 tausen viau long intenet.

Rosie em i gat 14 krismas na em i bin winim Solomon Ailan Aikon long 2015.

Man husat i go pas long ol wok bilong rekodim dispela musik em Karl Bouro.

Bouro i tok nau ol i wok long kamapim ol fen bilong Rosie we bai klostu ol i rilisim musik bilong em yet.

# UN Sekyuriti Kaunsil i kros long Not Korea



**SUTIM ROKET:** Ol man long Saut Korea i lukim nius ripot long TV i soim Not Korea i sutim roket bom o misail i go antap long skai. Ol poto: ABC

**YUNAITET Nesens Sekyuriti Kaunsil i mekim wanpela imejensi bung bilong em na i wokim strongpela toktok i regensim Not Korea husat i bin sut long wanpela roket bom i go antap long skai long las wik.**

Kaunsil i tok ol bai givim sampela mekim save i go long Not Korea long brukim

UN resolusen o agrimen bilong dispela samting, Kaunsil Presiden, Rafael Ramirez, i tok.

Ol i bin salim dispela roket bom I go antap long skai long wes Not Korea long las wik Sarere, i go antap long Yelo Si na i bin pundaun klostu long Filipin, na dispela em i ken kamapim

birua long planti pipel.

US Stratijik Komanding sistem i bin luksave long dispela long ol masin bilong ol na luksave olsem Not Korea i salim dispela roket i go antap long skai.

Saina na Amerika i wok i wok long nupela mekim save resolusen long gavman bilong Not Korea.

# EU askim Turkey larim ol refuji kalapim boda



**Turkey i strong na tok ol i no laik larim ol refuji bilong Syria i kam insait.**

OL opisa bilong Yuropien Yunion (EU) i askim Turkey long larim planti tausen refuji bilong Syria husat i pas i stap long boda bilong en long Kilis bihain long ol i ranawe lusim ples bilong ol bikos long bikipela pait i wok long kamap long hap.

Foren Polisi Sif bilong EU, Federica Mogherini i tok Turkey i gat wok long lukautim ol dispela lain refuji. Tasol Turkey i tok ol dispela lain refuji i wok long kisim kaikai na

ples bilong slip olsem na watpo bai em i larim ol i go insait long Turkey.

Samting olsem 35,000 refuji bilong Syria i ranawe lusim ples bilong ol long Aleppo bihain long gavman bilong Syria i pait wantaim ol rebel paitman. Mis Mogherini i tok EU i givim mani long Turkey long helpim ol lain refuji husat i ranawe i kam kamap long dua bilong em.

EU i bin givim mani long Turkey long mun Novemba 2015 long lukautim ol refuji bilong Syria husat i kam kamap long Turkey.

EU Enlargement Commissioner Johannes Hahn na Dutch Foren Minista Bert Koenders, i mekim wankain singaut long Turkey.

"Mi lukim piksa bilong ol dispela pipel husat i sanap long boda bilong the Turkey na mi laik strongim dispela askim long larim ol pipel

husat i nidim tru helpim long kam insait," Mista Koenders i tok.

Tasol gavana bilong Kilis, Suleyman Tapsiz i tok ol i no inap larim ol refuji i go insait long Turkey.

"Dua bilong mipela i no pas tasol nau bai mipela i no inap larim ol kain lain olsem insait long boda bilong mipela," em i tok.

Turkey i kisim pinis 2.5 milien refuji bilong Syria.

Long dispela wik, ami bilong Syria wantaim ol bom balus bilong Rasia I helpim ol Syria long kisim berk Aleppo, bikipela siti long Syria.

Las wik, ol 60 kantri i bung long London na promi long givim bilien kina long helpim ol refuji bilong Syria. Samting olsem 4.6 milien pipel i ranawe lusim Syria bihain long dispela sivil woa i stat long 2011. Narapela 23.5 milien i nidim helpim insait long kantri.

# Pop Francis i lukim asples sios long Meksiko

POP Francis i go lukluk raun long Siapas wanpela stet long Meksiko na i lukim wei bilong ol Katolik long selebretim santu misa long pasin bilong ol asples India. Misa bilong ol i bihainim pasin bilong ol Katolik na kastom bilong ol asples we bipo ol lain bilong Vatiken i no save wanbel long en.

Ol i save putim ol han bilong diwai na ol kiau, i makim bilip bilong ol Maya long 'God Papa na Mama' na ol i save yusim ol arapela samting tu long Misa we ol bikman bilong sios i no wanbel long en.

Tasol Pop Francis husat i namba wan pop bilong Latin Amerika, i no wari long dispela pasin bilong ol asples. Bai em i go lukluk raun long dispela hap long Febueri 15 na ripot bilong Vatiken i tok bai Pop i givim tok orait long ol dispela lain i ken yusim tok ples bilong ol long Misa. Dispela Chiapas Mass bai i gat ol rit, na song long tripela tok ples bilong ol asples.

'Insait long sios yet i gat sampela asua i bin kamap,' Felipe Arizmendi, Bisop bilong San Kristobal de las Kasas we Pop Francis bai wokim Misa, i bin tok.

'Mipela i luksave olsem planti taim mipela i no bin luksave long ol dispela asples lain.'

I gat planti salens i wok long kamap nau long Katolik sios long dispela hap we ol

evanjelikal protetesten sios i wok long pulim planti pipel nau na we planti pipel tru i stap olsem ol tarangu long dispela hap we kopi diwai i save gro gut, ol ston haus bilong ol Maya long taim bipo na planti diwai na ol bikbus. Chiapas i gat bikipela namba tru bilong ol pipel, mak bilong 72 pesen long Meksiko husat i stap olsem ol tarangu.

Wanpela bikipela salens em gutpela wok bung namel long Katolik sios na ol asples lain bilong dispela hap. Inap planti handet yia nau ol i holim strong yet ol pasin tumbuna bilong ol na sampela taim i save kamapim kros namel long sios na ol dispela asples pipel.

Pasin bilong lotu long sampela komyuniti i save kamapim pasin bilong dring, kamapim planti dinau na kamapim ol bikbos ol i kolim 'caciques'

Ol 'tredisenel' Katolik taun i save mekim ol tarangu lain i kisim dinau long baim bikipela festival bilong ol lokal petron santu bilong ol we ol lain i save dringim planti strongpela dring long amamasim dispela festode. Ol pipel i save baim ol kaikai, dring, flawa na ol faiawoks long ol dispela lokal bos. Ol dispela bos i save givim dinau na bihain i gat bikipela intres tru antap long dinau. Long sampela komyuniti, ol pipel i rausim ol lain husat i

go joinim ol Protesten, na kisim graun na ol arapela samting bilong ol o stopim wara na pawa saplai i go long haus bilong ol.

Abdias Tovilla Jaime, wanpela evanjelikal pasto long Chiapas' Rivaiv Presbyterian Sios, i tok dispela kain pasin i no wok moa bikos 58 pesen bilong ol pipel long Chiapas i tok ol i Katolik long 2010. 'Mipela i lukim moa pipel i kamap ol evanjelikal Kristen long ol taun long Chiapas we ol lain i mekim pasin nogut long ol, Tovilla Jaime i tok.

Dispela pasin bilong Pop Francis long luksave long pasin bilong ol Chiapas long lotu i soim olsem em i no wari long wanem toktok ol lain long Vatiken i mekim bipo. Em i soim pasin bilong sios i laik harim kraik bilong ol tarangu lain. Long taim Pop Francis i go raun loing Bolivia long 2015, em i prea long ples we ol soldia bilong gavman i bin kilim wanpela Jesuit pater husat i strong long liberesen tioloji.

Long Chiapas, Pop Francis bai go lukim San Kristobal daiosis ples bilong tupela asples pater bilong Meksiko, Bisop Bartolome de las Casas long 16 senturi and Samuel Ruiz, husat i dai long 2011.

Ol asples pipel i laikim tru ol dispela tupela man tasol ol maniman na ol bikman insait long sios yet i birua long ol. Ol gavman opisa i save

sutim tok long Ruitz i helpim ol Zapatista rebel paitman long kamapim trabel long 1994 we ol i singaut long gavman i mas luksave long raits bilong ol.

Long taim liberesen tioloji muvmen i strong long hap bilong Latin Amerika bihain long Seken Vatiken Kaunsil long 1960 samting, Ruiz i traim long stopim ol Protesten na larim ol kastom bilong ol pipel i kam insait long pasin bilong wokim Misa.

Wanpela bilong ol dispela pasin em long larim ol marit man i mekim wok bilong sios bikos kalsa bilong ol i soim moa rispek long ol marit man i gat pikinini na i no long ol man husat i no marit na i no gat pikinini olsem ol pater. Sampela bikman long sios i wari ol marit dikon i wok long mekim wok bilong ol pater

Long 2002, aninit long Pop John Paul II, Vatiken Kaunsil i askim Chiapas daisis long stopim odinesen bilong ol dikon. Tasol aninit long Pop Franscis, ol odinesen bilong dikon i gohet gen.

"Tude long Chiapas na ol arapela hap bilong Meksiko na Latin Amerika, sampela pipel i givim baksait long tok ples, kastom na ol arapela pasin tumbuna bilong ol. Ol i ting em i samting bilong bipo na ol i no laik bihainim. Ol i tromoi ol dispela gutpela pasin i go pinis.

# Saina na USA bai mekim save long Not Korea

SAINA na USA i wok long stretim sampela mekim save ol bai givim long gavman bilong Kim Un bilong Not Korea bihain long ol i mekim wanpela nuklia test long Janueri 6 long dispela yia. Not Korea i tok olsem dispela i bin wanpela test bilong haidrojin bom, tasol ol opisa bilong US i tok wok painim ol i bin mekim i soim olsem em i no tru.

Dispela em i namba tu taim insait long wanpela mun we Not Korea i mekim kain pasin olsem we i bagarapim gutpela sindaun na sekuriti long Korean peninsula na dispela rijon wantaim US tu. Seketeri bilong Stet long US, John Kerry i bin mekim dispela toktok.

Mipela i tokaut gen long promis bilong mipela long lukautim sekuriti bilong ol pren bilong mipela wantaim Ripablik bilong Korea na Japan.

Dispela roket bom bilong Not Korea i yusim 'balistik misail teknologi' olsem na ol kantri i sutim tok long Not Korea long traim kirapim trabel long dispela hap bikos ol i brukim ol resolusen bilong Yunaitet Nesen Sekyuriti Kaunsil.

Gavman bilong Rasia tu i bin putim strongpela kros toktok long pasin Not Korea i bin mekim. Foren Minista bilong ol i tok Not Koea i no save harim singaut bilong ol intenesenel komyuniti na i soim gen olsem em i no wari long sindaun bilong ol pipel bilong en tasol i wok long tromoi mani long nuklia program bilong en.

Ripot bilong AP i tok Saut Korea na US i wanbel long staim toktok long salim THADD misail difens sistem long Saut Korea.

Luis Martinez bilong ABC na The Associated Press i givim dispela ripot.

# Ok Tedi main bai op gen

Ok Tedi main long Westen Provins



**WOL klas kopa main bilong kantri, Ok Tedi Mainin Limited (OTML), bai op gen long mun Mas dispela yia, Sif Eksekutiv Opisa (CEO) Peter Graham i tok.**

Mista Graham i tok OTML i lukluk long opim gen ol main operesen tasol tok orait i mas kam pastaim long Mineral Risos Atoriti (MRA) aninit long stetutori sefti.

“Mipela i amamas long go bek long wok tasol mipela i mas putim sefti i go pas na larim wok i kamap gutpela. Ol samting mipela i lainim taim maining i bin pas i mas helpim yumi long opim main gen,” Mista Graham i tok.

Ok Tedi maining opresen i pas na kampani i tingting long katim daun kos bilong ranim maining opresens.

Dispela i lukim planti ol wok manmeri bilong OTML i lusim haus long Tabubil na Kiunga taim OTML i salim ol haus na arapela properti bilong kampani.

Ok Tedi i bin pasim ol opresen bilong maining long las yia bihain long El Nino na drai weda i daunim level bilong Flai Riva i go daun.

Dispela i mekim hat long ol sip i ran go i kam long Flai Riva long kisim kago saplai bilong maining na tu ol arapela samting saplai bilong ol marasin na kaikai.

“Bikpela ren i wok long pundaun long Kiunga na Tabubil na i apim level bilong Flai Riva i go antap gen

na larim ol sip i kisim sampela ol nambawan samting we maining bai nidim,” Mista Graham i tok.

Em i tok haidro pawa na wara level bilong Flai Riva em i tupela nambawan samting bilong kirapim gen Ok Tedi maining na dispela tupela samting i nau stap gut.

Siaman bilong OTML, Sir Moi Avei, i tok taim OTML i bin stopim opresen, dispela i bin kamapim planti hevi tasol dispela em i kamapim gutpela samting tu we OTML i bin stretim em yet gen na kamap wanpela strongpela kampani.

Long mun Ogas las yia, OTML i bin pasin maining opresen taim level bilong Flai Riva i pundaun.

OTML i bin mekim sampela ol bikpela senis long larim opresen bilong maining i kirap gen bihain long ol i pasim maining taim drai weda na hot san i daunim level bilong Flai Riva.

Wankain olsem ol arapela kopa na gol maining kampani, OTML tu i wok long bungim bikpela salens taim prais bilong ol metal olsem gol na kopa i wok long go daun insait long 6-pela yia nau.

Aninit long ol dispela hevi, OTML i ting ting long mekim sampela bikpela senis we dispela bai kirapim produktiviti na daunim prais bilong opresen.

Ol wok manmeri bilong

OTML i kisim toksave pinis long wanem samting bai kamap long sais bilong wokfos, taim bilong wok, tems na kondisen bilong wok, haus na travel samting bilong ol wok manmeri.

Taim opresen bilong maining i kirap gen, OTML bai daunim 10 pesen bilong namba bilong ol wokman i kam daun na olgeta wok manmeri bai no moa slip long haus bilong kampani tasol ol bai flai i kam insait na flai i go aut long wok ples.

Kampani bai larim ol lokol wok manmeri long Tabubil na Kiunga yet long rentim kampani haus na muvim ol famili bilong ol i kam insait long ol dispela haus bilong OTML i stap nating.

OTML i saspending o stopim ol opresens bilong en long Ok Tedi Maining tasol sampela wok manmeri i stap yet long mekim ol wokmentenens, sekyuriti na redi long kirapim gen opresen.

Sampela ol namba wan wok long Mein Inlet Valvs long Ok Menga Haidropawa Stesen na ol mentensens wok prosesin plent bai pinis klostu taim tasol.

Ol wok i wok long go het long sekim sapos ol i ken putim nupela Sag mil long yia 2016.

OTML i wok long glasim na sekim gut ol weda samting long larim maining opresen i kirap gen.

# Komo mas kamapim komesal flait

PRAIM Minista Peter O’Neill i wok long kirapim ol arapela bikpela ples balus insait long PNG tasol em i no mekim wanpela gutpela samting long kirapim na yusim bikpela Komo Ples Balus long Hela Provins.

Mista O’Neill i bin tokim ol manmeri bilong Hela taim em i bin go lukim Tari, Koroba, Komo na Nogoli las yia olsem em bai larim Komo ples balus i mekim ol komesal flait operesen.

Tasol dispela i no bin kamap yet na Mista O’Neill i wok long opim ol nupela ples balus long Kagamuga long Mt Hagen, Hoskins long Kimbe, Gurney long Alotau, na Girua long Popondetta.

Gavman bai putim K4 bilien long kirapim Jackson’s ples balus long Pot Mosbi long redim kantri long holim bikpela bung bilong ol lida bilong APEC kantri.

Opreta bilong PNG LNG Projek, ExxonMobil, i bin kirapim dispela bikpela ples balus long yia 2013 taim ol i laik kisim sampela ol bikpela masin bilong kamapim refaineri bilong PNG LNG Projek.

Maski Mista O’Neill i tok promis pinis long larim ol komesal flait i kamap long Komo, dispela i no kamap yet.

Nau ol balus sata bilong PNG LNG Projek tasol i wok long yusim dispela bikpela ples balus i stap namel long bikpela bus.

Tasol las wik Memba bilong Komo-Margarima, Francis Potape, i singautim PRAIM Minista Peter O’Neill long lukluk long Komo ples

balus tu, wankain olsem em i wok long kirapim ol arapela ples balus insait long kantri.

Mista Potape i salensim gavman long lukluk i go insait long dispela ples balus bikos dispela ples balus i ken senisim laip bilong ol manmeri na bringim planti gutpela samting sapos gavman i kirapim wanpela bikpela teminal haus wankain olsem Jackson’s na Kagamuga ples balus.

“PRAIM Minista i wok long opim ol nupela ples balus long ol arapela provins. Mipela long Komo, mipela ol papa bilong PNG LNG ges i laikim em long kirapim ples balus na kamapim dispela ples balus olsem wanpela bikpela intanesenel ples balus insait long PNG,” Mista Potape i tok.

“ExxonMobil i yusim bikpela mani long kirapim dispela ples balus. Hela provinsal gavman na nesanel gavman i mas lukluk long kirapim dispela bikpela ples balus bilong yumi na mekim dispela ples balus i redi long komesal sevis,” Mista Potape i tok.

Em i tok gavman i nau larim ol PNG Difens Fos i yusim long mekim ol sekyuriti wok bilong PNG LNG Projek na long trening.

“Dispela em i gutpela samting. Yumi mas kirapim nesanel sekyuriti bilong PNG. Na yumi mas kirapim moa bisnis tu.

“Mi laik askim PRAIM Minista Peter O’Neill long kirapim Komo ples balus. Sapos gavman i ken kirapim

Kagamuga ples balus long Mt Hagen, Hoskins ples balus long Kimbe, na Gurney ples balus long Alotau, em i mas kirapim Komo ples balus tu.

“ExxonMobil i stap long Komo. Oil Search i stap long Komo. HGDC i stap long Komo. Planti ol biknem kampani i stap long Komo.

“Ges na oil bilong Komo na Hela i sapotim ikonomi bilong PNG. Gavman mas kirapim bikpela teminal bilding long larim Komo i kamap wanpela bikpela intenesenel ples balus we i ken kisim ol bisnis manmeri na turis i kam insiat long kantri,” Mista Potape i tok.

Em i tok ol pipel bilong Hela i redi long mekim bisnis wankain olsem ol manmeri long Mt Hagen i redi long mekim bisnis taim PRAIM Minista i opim nupela Kagamuga ples balus.

“Ol manmeri Hela i laik mekim bisnis. Dispela ples balus i no ken stap nating. Em mas karim ol pasindia manmeri i kam long Komo na i go ausait long Komo,” Mista Potape i tok.

Em i tok sapos Komo ples balus i kirap, dispela bai bringim moa bisnis i go insiat long Hela. Mista Potape i laikim nesanel gavman na Hela provinsal gavman long wokbung wantaim na opim komesal flait long Komo ples balus.

Em i tok gavman i wok long westim mani long stretim gen Tari ples balus taim Komo i gat bikpela ples balus.



Bikpela Komo ples balus long Hela Provins. Foto: Intanet

# Egrikalsa i nidim gutpela lida

**GUTPELA lidasip long egrikalsa bai kirapim planti gutpela samting na helpim dispela sekta long kirap gen.**

Dispela em i toktok bilong Siaman bilong Rurel Indas-tris Kaunsil, Sir Brown Bai.

Sir Brown i tok egrikalsa bai sapotim ikonomi bilong kantri nau na long bihain taim tu.

"I no olsem ol arapela

risos olsem gol, ges na kopa we ol prais bilong ol dispela samting i save pundaun go daun na kirap gen.

"Ol kaikai na ol samting i save kam long egrikalsa. Dispela indastri bai sapotim ol manmeri bilong yumi long planti yia.

"Yumi mas sapotim dispela sekta na larim egrikalsa sekta i stap gut. Ol maining

na petroleum projek bai pinis tasol egrikalsa bai stap yet.

"Yumi mas luksave gut long dispela na wokbung wantaim long kirapim

egrikalsa sekta. Lidasip em i namba wan.

"Kantri i nidim gutpela lidasip long egrikalsa sekta. Gutpela lidasip bai soim rot na stretim ol samting long kirapim gen egrikalsa sekta.

"I gat planti wok i stap long mekim. Na gutpela na strongpela lidasip bai soim stretpela rot mekim ol wok," Sir Brown i tok.

Wankain taim, Memba bi-

long Bulolo, Sam Basil, i tok gavman i mas lukluk i go insait long egrikalsa na yusim ol manmeri i stap nating long planim kaikai long ol bikpela fam.

Mista Basil i tok PNG i gat bikpela graun i stap nating na gavman i mas yusim dispela graun long planim kaikai, lukautim ol enimal olsem pik, kakaruk na sipsip long salim.

Oposisen Lida Don Polye tu i wok long singautim gavman long helpim ol liklik manmeri long ples.

"Wanpela gutpela rot long helpim ol manmeri long ples em long kirapim egrikalsa sekta na larim ol i wok long hap.

"Dispela i ken kamapim wok mani na helpim ol manmeri. Ikonomi bilong kantri tu bai gro," Mista Polye i tok.

## Moro ples balus kisim setifiket

MORO ples balus bilong Oil Search Limited long Kutubu, Sauten Hailans i kamap namba 2 ples balus long kisim Aerodrom Opereting Setifiket long 5 yia.

Sivil Aviesen Sefti Atoriti (CASA) bilong PNG i givim dispela setifiket long Oil Search long larim dispela oil na ges kampani i ranim na opretim dispela ples balus i go inap 5-pela yia.

Sif Eksekutiv Opisa (CEO) bilong CASA PNG, Wilson Sagati, i tok tenkyu long Oil Search i lukautim gut dispela liklik ples balus wantaim hai sefti standat.

"Mi amamas na tok tenkyu long Oil Search Moro i kamap narapela ples balus insait long PNG long gat gutpela na hai sefti standat. Dispela i lukim Moro ples balus i kisim Aerodrom Opereting Setifiket long 5 yia.

"Oil Search i go pas long sefti samting bilong Moro ples balus na mi laikim ol

narapela ples insait long PNG long bihainim dispela.

"Oil Search i gat hai sefti menesmen standat na dispela i lukim ples balus bilong ol i kamap namba wan ples balus long kisim 5 yia opretim setifiket," Mista Sagati i tok.

Aviesen Lojistiks Kodineta bilong Oil Search, Mark Noli, i tok tenkyu long

CASA PNG long helpim ol wantaim ol gaidens toktok long kirapim sefti level.

"Mi laik tok tenkyu long CASA PNG, menesmen tim na ol arapela wok manmeri husat i bin sapotim mipela," Mista Noli i tok.

Long kisim dispela setifiket, Oil Search Moro i bin kirapim wanpela sefti

menesment sistem manuel.

Oil Search Moro i bin kamapim wanpela buk we dispela i bihainim lo bilong balus na ples balus sefti, na dispela i lukim standat bilong ples balus, ol samting bilong stopim paia i stap antap long level 6, na ol arapela samting bilong ples balus i bungim mak we CASA PNG i laikim.

## Kirapim websait bilong yu yet

TELKOM PNG i lonsim wanpela nupela prodak bilong ol na dispela prodak em i wanpela gutpela prodak stret.

Telikom PNG i lonsim onlain na websait solusen we bai larim ol manmeri na ol liklik bisnis i gat websait.

Tude, websait em i wanpela namba wan samting ol bisnis manmeri i mas gat long promotim bisnis bilong ol. Wankain tasol, ol manmeri nating tu i mas gat websait bilong ol yet sapos ol i mekim sampela samting long laik bilong ol yet we ol narapela manmeri i ken lukim na laikim.

Telikom PNG Marketing na Bisnis Developmen Divisenal Menesa, Xavier Victor, i tok planti manmeri na ol liklik bisnis o SME bai kisim bikpela benefit long dispela nupela prodak bilong Telikom.

Ol SME ona o papa bilong ol liklik bisnis i ken putim kampani profail long websait na dispela i ken promotim kampani bilong ol, em i tok.

"Websait em i gutpela samting long kirapim bisnis. Ol komesal tim bilong mipela i bin mekim wanpela maket risets na dispela i bin painimaut olsem planti ol SME o ol liklik bisnis, ol non gavman ogenesisen, na sampela bikpela kampani tu i no gat websait," Mista Victor i tok.

Mista Victor i tok dispela onlain websait prodak bilong Telikom em i gutpela tru bikos em i no nidim wanpela web developa o save long web disain.

"Olgeta samting i stap pinis. Yu no nidim wanpela saveman bilong kompyuta long stretim ol samting bilong kirapim websait, bai yu



**Kompyuta na websait i tatsim laip bilong planti manmeri tude.**

mekim long laik bilong yu yet.

"Olgeta wok na ol arapela samting we kompyuta teknisen inap long mekim em i Telikom yet i mekim pinis. Mipela i gat ol templet bilong na dispela templet i no nidim sapot bilong save man bilong kompiuta," Mista Victor i tok.

Dispela nupela onlain prodak i gat ol samting bilong peim mani long onlain yet, ol samting bilong salim niusleta, ol samting bilong kamapim ol blog, email inap long kamapim 5 email akaun na ol arapela gutpela samting.

Ol kastoma husat i laik lukim ol dispela websait templet i ken go insait long websait long Telikom PNG na sekim.

Websait bilong Telikom PNG em i [www.telikompng.com.pg](http://www.telikompng.com.pg) o i ken go stret long [www.telikompngsites.com](http://www.telikompngsites.com). Prais bilong dispela prodak em i no bikpela mani. Ol narapela kampani i save sasim bikpela mani tasol Telikom i sasim liklik mani.

Intanet em i wanpela nambawan samting long dispela taim bikpela planti samting long sait bilong bisnis i wok long kamap long intanet na kompyuta tasol.



Ol pasindia i kam ausait long ATR balus bilong PNG Air long Oil Search Moro ples balus.

## Liklik bisnis kirap isi isi

GAVMAN i toktok planti long kirapim ol liklik bisnis o SME tasol sampela polisi na eksen bilong gavman i no sapotim ol liklik manmeri bilong yumi long kirapim bisnis, Deputi Oposisen Lida Sam Basil i tok.

Mista Basil i tok 97 pesen graun long PNG i stap aninit long kastomari lenonasip, we ol papagraun yet i bosim graun bilong ol yet na 85 pesen bilong manmeri i stap

long ples na i save mekim ol wok egrikalsa long stap.

Mista Basil i salensim gavman long lukluk long SME na kirapim wanpela gutpela polisi long helpim ol manmeri long ples i gat gutpela sindaun na i kirapim ol liklik bisnis.

"Gavman i mas lukluk gut na skelim gut laip bilong ol manmeri bilong yumi. Moa manmeri i stap long ples na ol i wok long planim ol

gaden kaikai, pikim kopi na kokoa, lukautim pik na kakaruk, na mekim ol arapela wok egrikalsa long ples," Mista Basil i tok.

Mista Basil i salensim gavman long yusim gut bikpela graun i stap nating long kantri na kirapim egrilaksa bisnis.

Em i tok ol manmeri bai gat bikpela sans long mekim bisnis, kisim mani na kirapim gutpela laipstail sapos gav-

man i kirapim moa egrikalsa bisnis long olgeta hap long PNG.

"Gavman i mas lukluk long SME polisi. Em i mas gat plen long yusim graun i stap nating long PNG, we ol papagraun yet i lukautim ol dispela graun.

"Planti ol manmeri husat i no gat wok na i stap nating ples i ken kisim wok sapos gavman i senisim ol graun i stap nating na kirapim ol bikpela fam bilong planim kaikai," Mista Basil i tok.



Gavman i mas sapotim ol manmeri mekim liklik bisnis long egrikalsa sekta.

# Ol fama lainim wei bilong lukautim ol kakaruk



Ol fama lain long bungim ol asples kaikai long miksim wantaim long givim ol broila na leia kakaruk. Foto: NARI

SIKSTI wan kakaruk fama insait logn Yawar Lokal Level Gavman (LLG) bilong Bogia Distrik long Madang provins i bin kisim wanpela trening long we bilong givim gupela kaikai na lukautim ol kakaruk bilong fam insait long Kosakosa viles.

Wol Visen projek aninit long Yuropien Yunien Smolholda Maket Ekses Projek i bin go pas long ranim dispela trening. Insait long PNG ol pipel na ol fama i no save putim bikpela hatwok tumas long lukautim gut ol kakaruk long wei bilong kaikai, ples slip, taim bilong putim kiau na lukautim ol liklik bebi kakaruk. Dispela kain pasin i mekim na ol kakaruk i no save karim planti kiau o sapos ol kiau i bruk tu, ol kakaruk i no stap long strongpela banis we stilman na enimal i no inap long stilim, kilim na bagarapim ol.

Tasol pasin bilong lukautim kakaruk em i stap long ol ples na ol kakaruk bilong ples inap long stap long kainkain taim na ples na ol i

no save dai nating.

Ol kakaruk fama i kam long trening em ol i lainim we bilong lukautim kakaruk bai karim planti kiau, long lukautim bebi kakaruk stat long wanpela de bihain long kiau i bruk, na long givim kaikai na lukautim i go long taim ol inap long kisim kiau gen.

Ol i lainim tu long wanem kain wei ol i inap long mekim lapun kakaruk i karim kiau yet long namba tut aim na namba tri taim. Dispela kain wei em i gutpela bilong ol liklik fama husat i gat ol lapun kakaruk i kam long ol bisnis fam long ol i kamapim kiau.

Ol ples kakaruk i nidim gutpela kaikai i gat butpela samting bilong gro na strongim sistem bilong kamapim kiau insait long ol long karim planti, na tu, long taim ol i gro bai i gat moa mit na hevi. Long mekim dispela, ol fama i lainim we bilong givim kaikai long ol kakaruk wantaim ol gutpela kaikai bilong aspels yet na long yusim ol tul bilong ples yet olsem greta, sisis bilong

holim paia, naip na ol dis.

I gat tupela stail we ol trenai i soim long ol fama; (1) miksim marasin bilong kakaruk long NARI wantaim tapiok, kaukau long skel bilong ol i hap marasin na hap kaikai bilong gaden. Ol kaukau na tapiok em ol i skrapim na miksim wantaim ol lip na ol rop bilong bus na ol bun we ol i paitim, paitim na putim long san long drai. Bihain ol i paitim moa inap ol i kamap paora nating na bihain ol i miksim gen.

Ol fama i kirap nogut na amamas long lainim ol dispela nupela we bilong fidim ol kakaruk. Ol i harim gut tru na lainim samting. Planti bilong ol ples lain i kam long bus maunten na long nam-bis tru na sampela i kam olsem long arere bilong Wara Ramu na Sepik i bung.

Ol fama i kisim toksave long ol i mas statim wok liklik pastaim na ol inap luk-save long wanem kain ol hevi i stap na stretim na tu ol i kisim tok skul long kaikai kakaruk planti taim long strongim bodi.

# Kopi Growa Siaman laikim patnasip i karim kaikai

WANPELA bilong ol bikpela growa o fama grup, PNG Smolholda Kopi Growa Asosiesen (SHCGA), i laikim wok bilong patnasip namel lon g olgeta lain insait long kopi indastri o bisnis i mas karim kaikai.

Dispela singaut i kam long Siaman bilong SHCGA, Joseph Kom. SHCGA i makim moa long tu milien growa bilong kopi insait long olgeta kpi provins long kantri.

Mista Kom i tok em i bikpela samting long olgeta stekholda insait long indastri wantaim ol growa long wok bung wantaim Kopi Indastri Kopresen (CIC) long kisim kopi indastri i go long narapela mak antap.

Ol fama i mas inap long kamap ol bisnis man na meri long groim na holim strong indastri na laip sindaun bilong ol.

Mista Kom i luksave long wok bilong CIC long helpim planti rurel fama long PNG.

“Mi mamas long sapot bilong CIC na mi laik lukim gutpela wok we patnasip namel long olgeta lain insait long en olsem ol Distrik Developmen Atoriti (DDA), Lokal Level (LLG) na Provinsal Gavmen, NGO, ekspota na ol prosesa long wok bung wantaim.

“I no gat samting em yumi no inap long wokim. Yumi ken bung wantaim na bringim kopi prodaksen na kwaliti bilong kopi i kam bek gen long bringim gutpela laip long ol milien growa bi-

long yumi insait long antri.” Mista Kom i tok.

Mista Kom i strongim gen toktok we CIC projek menesa bilong Prodaktiv Patnasip long Egrikalsa Projek (PPAP), Potaisa Hom-bunaka i mekim long salensim ol fama long tingting gen na mekim wok olsem wanpela bisnis.

“Yumi i bin stap fama long planti yia. Nau yumi mas kamap bisnisman na meri insait long kopi indastri. Em tingting we yumi mas i gat na wok strong long groim ol smolholda growa bilong yumi i go long narapela level insait long indastri,” em i tok.

Siaman Kom i luksave tu long kopi rihabilitesen wok we CIC aninit long PPAP na fanding bilong Wol Benk IAD, IFAD wantaim sapot fanding long Gavman bilong PNG i putim.

Wanpela bilong ol dispela wok em long kamapim gut na strongim wok bung bilong ol sekta institusen insait long kopi indastri.

“Gavman i toktok logn 85 pesen bilong ol pipel husat i taitim bung long ol ples tasol ol i wok long givim yet strong long rurel ikonomi, tasol sistem i no givim bek gutpela bekim long ol.

“Mi laik singaut long ol pablik sevan bilong yumi long kamapim gutpela wok bilong monitaim na ivaluetim o sekim ol sistem we gavman ii kisim ol sevis i go aut long

helpim ol tarangu rurel fama na ol mama na pikinini long gat gutpela sindaun.

“Kopi na egrikalsa sekta em i laiplain bilong ol rurel pipel bilong yumi. Olsem na apoinmen bilong wanpela Bod bilong kopi em i bikpela samting long kamap. Dispela bai mekim rot bilong sekim na glasim wok bilong menesmen na pefomens bilong sekta.” Mista Kom i tok.

Mista Kom i makim ol smolholda kopi growa long Simbu Provins na ol i makim em olsem siaman bilong PNG SHCGA long Novemba las yia. Em i kisim ples bilong Peter Kewa bilong Westen Hailans SHCGA.



PNG Smolholda Kopi Growa Asosiesen Inc Siaman, Joseph Kom.

Mani kisim poto, Mathew Yakai i lukim tupela yangpela man bilong Nabasa Strit long Madang taun las wik Tunde 2 Febueri, taim tupela i wok long katim gras

baksait long Air Niugini opis an arere long Telikom PNG Ltd opis.

Ol i tok olsem PNG Pawa i baim ol long mekim dispela wok. Madang taun em i

wanpela hap we ol turis i save laik go raun tasol long dispela taim ol rot bilong taun i bagarap tru na i pulap long ol pothole. Ol baret bilong ol wara i no moa stap ples kliia na bus i karampim olgeta hap.

Taun tu i pulap long pipia. Em i wanpela wok bilong Madang Eben Lokal Level Gavman na Madang Provinsal gavman long klinim na stretim lukluk bilong taun tasol olgeta pablik tu i mas helpim long lukautim ol pipia bilong ol. Ol lain i stap long taun i laik traim long daunim pasin bilong stilman tasol ol i mas stat wantaim klinpela taun.

## MADANG YUT KLINIM TAUN



Piksa na stori i kam long Mathew Yakai bilong MY Midia na Nius Ejensi

## Titans bilong Mavericks Surfing resis i stop liklik



**WANPELA** bikpela resis long solwara ol i kolim Mavericks Surfing resis long San Fransisko, USA, i stop liklik taim bikos ol i salim olgeta imejensi sevis i go long Supa Bowl 50 long Mande moning.

Olgeta pilaia insait long wol husat i save resis long solwara i go long Mavericks resis bihain long ol i salim pas i kam.

Olgeta pilaia husat i go long hap bilong resis i lainap gen bikos ol i gat gutpela sans taim ol imejensi sevis i go long helpim dispela Supa Bowl 50.

Wanpela man Australia - husat i save resis long solwara - Josh Karr, em i wina bilong

bikpela weiv resis long Meksiko na em i bin go long hap tu.

Ol i no bin salim pas i kam long em long go long dispela resis, tasol em i bin painim sans insait long taim resis i stop liklik.

"Mi no save gut long politik, tasol mi ting olsem Supa Bowl i stopim dispela resis long kamap," Karr i tok.

"Mi ting olsem planti ol pilaia bai resis long Mavericks i paslain long go long hap bilong resis, tasol nau mi gat inap sans long go resis long Mavericks.

Mavericks i kamap namba wan hap bilong resis long solwara.

## Stosure i go pas long Australia long Fed Kap



**SAM Stosur** i go pas long Australia long Fed Kap Wol Grup II tenis na daunim Slovakia na winim 3-pela raba na bringim tim bilong em i kam bek long haus.

Stosur na wol namba 3 dabol pilaia, Casey Dellacqua, i bin pait bek egensim Jana Cepelova na Daniela Hantuchova 5-7, 6-1, 6-2 na winim resis wantaim 3-2 poin.

Stosur i holim Australia long resis wantaim win long tupela singel resis, na em i redi long namba 3 resis bilong em.

Cibulkova, em i bipo i wol number 10 pilaia, i daunim Birrell long Hobart Open, bikos Birrell i senisim stail bilong em.

Cibulkova i winim 8-pela gem long daunim Birrell. Long wankain taim, Rasia na Itali

i bin pait long Grup I long Fed Kap resis. Tupela i winim 8-pela bilong 12 taitel bilong Fed Kap, i bin lus long resis i bin kamap long dispela yia.

Rasia em i sempion long yia 2004, 2005, 2007 na 2008, i bin lus long Natherland, Moscow, we poin i sanap olsem 3-1.

Itali i bin kamap taitel wina long yia 2006, 2009, 2010 and 2013, i bin go aut long namba wan raun we skoa i sanap olsem 4-1 na France i win long Marseille.

Tasol, Switzerland, husat i no save win long Fed Kap, i winim semi-fainal long namba wan taim bilong em bihain long 18 yia, wantaim 3-2 na daunim Jemani long Leipzig.

## Barty i go bek long tenis



**ASHLEIGH Barty** i go bek long tenis, bihain long em i pilai kriket long wanpela sisen wantaim Brisbane Heat.

Barty em i bipo sempion bilong Australia Wimbledon na nau em bai i gat namba tu sans long go bek gen long profesenel tenis wok bilong em.

Barty i lusim tenis inap 17 mun i go pinis bihain long em i wok hat long lukluk long ol salens bilong dispela spot.


Long yia 2015 inap 2016, em i bin pilai kriket wantaim Brisbane Heat long Women's Big Bash Lig.

Barty i bungim bikpela na wol renk 129 poin long 2013 taim em i gat 17 krismas na ol i lukim em olsem klostu taim em bai kisim ples bilong Sam Stosur olsem namba wan meri bilong Australia.

Long dispela yia, em i mekim tupela fainal long grand slam long Australian Open, Wimbledon na US Open wantaim Casey Dellacqua na winim wanpela raba long Fed Kap.

"No gat wanpela lain long wol i save olsem mi bin go long winim junia Wimbledon bihain long 6-pela mun long Australian Open. Mi amamas long dispela," Barty i tok.

## Costa i sevim Chelsea



**DIEGO Costa** i stopim taim long sevim menesa Guus Hiddink long stap pas yet long rekot taim Chelsea i egensim Manchester Yunaitet na skoa i sanap 1-1.

Yunaitet i stap klostu long top 4 bilong Premia Lig wantaim 4-pela poin, tasol Costa i mekim na ol i stap long wankain ples.

Jesse Lingard i putim gol long 61 minit mekim na ol pilaia bilong Louis van Gaal's long winim olgeta 3-pela resis.

Long namba 6 minit senta-bek pilaia bilong Chelsea, Kurt Zouma, i kisim bagarap long skru bilong em.

Costa i yusim David de Gea long skoa na skruim moa i go long Jose Mourinho insait long 10-pela resis.

"Mi i amamas long pilai bilong tim. Manchester Yunaitet em i no wanpela isi tim long daunim, tasol mipela i amamas long poin mipela i kisim," Hiddink i tok.

## Dave Mirra long X Gems i dai

Ol polis i strongim toktok olsem namba wan pilaia bilong X Gems BMX lejen, Dave Mirra, husat i gat 41 krismas i bin dai long Not Carolina.

Ol i bin painimaut bodi bilong Mirra long wanpela bikpela kar long Fonde. Ol polis i bin go lukim bihain long ol i harim olsem em i bin kilim em yet.

Em i wanpela namba wan pilaia long histori bilong X Gems. Mirra i winim 14 gol medal namel long 1995 na 2008, na i gat 24 medal taim em i bin wok olsem pilaia bilong etletik.

Ol man i gat pawa long hap bilong Mirra i tok, "Mirra i bin go long dispela hap long

lukim wanpela poro bilong em."

Siti Meya bilong Greenville, Allen Thomas, i tok, "Mirra em i wanpela gutpela poro na namba wan man husat i save helpim laip bilong planti lain insait long wol."

Mirra em i wanpela BMX raida, husat i bin resis long X Gems na olgeta medal tali em i bin winim em ol i save rekodim long spot. Long 2013, Bob Burnquist, i bungim medal tali rekot bilong em.

Em i gat tupela vidio gems i save kirapim nem bilong em na em i wanpela bilong tupela namba wan etlit long winim planti gol medal long tripela X Gems.



# Ramu NiCo bung long 2016

## Wok Konprens

**BOD, Menesmen na wokman meri bilong Ramu NiCo Menesmen (MCC) Ltd i bin sindaun long 2016 Annual Wok Konprens bilong ol long las wik Fraide long tokaut long ol wok-plen na gol bilong Kampani dispela yia.**

Dispela bikpela konprens tu i glasim na tokaut long rivi u wok we i bin kamap long las yia 2015 na i glasim wanem ol bikpela samting we Kampani i bungim na wok em i mas wokim long stretim.

Dispela 2016 em Vais Presiden Charles Zha i stap olsem siaman blong en na i lukim ol wokman na sinia menesmen na bod i sindaun na harim na i bin kamap long tele-video konferens we ol lain long KBK Main, Basamuk Rifaineri, Madang Bes na China opis i bin lukim na harim toktok.

Presiden bilong Ramu NiCo, Wang Jicheng, husat i givim ol bikpela toktok long sait long rivi na samari bilong wok bilong Kampani na wanem ol bikpela salens i kamap.

Mista Wang i tokaut olsem long 2015 Kampani i givim bikpela taim na mekim bikpela wok long rait long prodaksen remp-ap na stebilaisesin o stretim na redim gut olgeta wok masin bilong wok operesen. Kampani i bin wok strong tru long sait long kontrolim mani em i yusim na tu wok strong long ol eria bilong daunim kos na wok gut long sait long stretim menesmen bilong en. Ol dispela wok Kampani i wokim i bihainim strongpela daireksen o wok-mak em MCC Grup i putim long daunim kos na kontrolim mani.

Mista Wang i tokaut long miting olsem wantaim gutpela sapot na strongpela hatwok bilong olgeta wokman, RNML i bin kamap wantaim averes prodaksen mak olsem 78.5 % long las yia.

Em i tokaut tu olsem Kampani i wok gut long stretim anuel Helt Sefti na Envairomen (HSE) wok-

mak bilong en long las yia na i kamapim gutpela prodak kwaliti wantaim liklik kos. Kampani i kamapim tu gutpela wok long sait long wokim ol senis long sampela ol wok eria o dipatmen bilong en, strongim gutpela wok long komyniti rilesins. Moa long en tu em i wok strong long sait long wokbung long sait long komyniti rilesins, na stretim ol hevi na tu i bringim ap sampela gutpela stail long long kamapim gut ol wok.

Presiden Wang Jicheng i tokaut tu long ol bikpela plen bilong 2016 we bai i bungim wok bilong Kampani na strongim Kampani tingting bilong kampani long kamapim wantaim wok-mak o gol bilong en long dispela yia 2016.

Em i tok RNML nau yet i gat planti ol kain kain salens. Olsem na bikpela samting nau em long olgeta wokman na menesmen tim long bungim tingting wantaim long kamapim gutpela wok we em helti, na gutpela long lukim operesin i ran orait long dispela yia 2016.

"Maski olsem dispela ol salens i stap, mipela mas wok strong long sait long kamapim gutpela prodaksen, kontrolim mani mipela i yusim na strongim sait long menesmen na tu wok strong na kamapim gutpela kwaliti prodak,

"Mipela mas kamapim gutpela wok-pren na bihainim pasin bilong intenesenel kalsa na gutpela menesmen na kamapim hai gret kwaliti prodak," Mista Wang i tok.

Konprens long Fraide tu i tokaut long 42 wokman husat i wok strong na Kampani i luksave long ol. Ol lain i kisim gutpela luksave em ol wokman long KBK Main, Basamuk Rifaineri na Madang bes.

Wan wan ol lain i makim ol wokman i kisim taim long givim toktok long tok tenkyu long Kampani long wanem samting ol i wokim na sapot ol i kisim long Kampani na ol wanwok bilong ol long kisim dispela luksave.



RNML Annual Wok Konprens long Basamuk Rifaineri.

Working Conference 2016 Ramu Nico Management (MCC) Ltd.




Ol wokman bilong Ramu NiCo husat i kisim awot long gutpela wok long yia 2015.



Presiden bilong RNML, Wang Jicheng i tokaut long 2016 wok plen na salens.



Olgeta wok sait bilong Ramu NiCo miting long vidio konprens.



KBK Mining

135 KM Slurry Pipeline

BSK Refinery



# Bahamas bai lukautim 2017 Komonwelt Yut Gems ...Belfast, Noten Ailan (NI) bai lukautim long 2021

Komonwelt Gems bilong ol yangpela manmeri bai kamap long Bahamas long yia i kam, 2017. Dispela gem bai bungim 1000 yangpela pilaia husat i gat krismas namel long 14 inap 18. Piksa i soim plak bilong Bahamas, husat bai lukautim Komonwelt Gems bilong ol Yangpela.  
Piksa: Intanet



KOMONWELT Gems bilong ol yangpela manmeri bai kamap long Bahamas long yia i kam, 2017.

Belfast, Noten Ailan (NI) bai kamapim wankain pilai long yia 2021.

Dispela gem bai bungim 1000 yangpela pilaia husat i gat krismas namel long 14 inap 18.

Dispela bai namba 6 Komonwelt Gem bilong ol yangpela lain na bai kamap long Julai 19 inap 23 long kapitel siti bilong Bahamas, Nassau. Na namba 7 resis bilong Komonwelt Yut Gems bai kamap long Sama.

I gat 7-pela spot bai kamap em swimming, trek na fil resis, boksen, judo, ragbi sevens, wilwil resis na tenis.

Dispela bai i namba wan taim bilong judo resis i kamap long Komonwelt Gem bilong ol yangpela. Na bai namba tu taim bilong wanpela liklik ailan kantri kamapim dispela gem olsem, Samoa, i bin go pas long 2015 Komonwelt Yut Gem long mun Septemba.

Dispela em i namba wan Komonwelt Gems resis long kamap long Keribian bihain long 50 yia. Las Komonwelt Gems i bin kamap long Keribian em long yia 1966 long Kingston, Jamaica.

Presiden bilong Komonwelt Gems Federesen, Louise Martin CBE, i tok, "Mi gat bikpela amamas long tokaut olsem Eksekutiv Bod bilong Komonwelt Gems Federesen i vot long givim dispela Komonwelt Yut Gems resis long Bahamas.

"Komonwelt Gems bilong ol yangpela em i narakain na bikpela sans bilong ol yangpela pipel long pilai spot.

"Mi amamas na tok tenkyu long komiti bilong Bahamas i wok strong long kamapim Komonwelt Yut Gems long Bahamas na ol i daunim ol narapela kantri husat i resis to long winim dispela gem."

Olgeta resis bai kamap long wanpela pilai hap long Queen Elizabeth Spot Senta na dispela pilai hap i gat wol klas, Thomas A Robinson stadium wantaim 15,000 sit. Ol bai opim na pasim gem long Thomas A Robinson stadium wantaim ol etletik resis bai kamap long wankain hap.

Ol narapela spot olsem wilwil resis bai kamap long olgeta hap olsem ol komyuniti na strit bilong ailan.

I gat moa long 500 de i stap yet long opim dispela gem na ol Bahamas i mekim wok redi long soim kala bilong ol long dispela resis.

Bipo, dispela ailan i bin lukautim, CHOGM long 1985, na bung bilong Komonwelt Edukesen Minista long 2015.

Seketeri Jenerel bilong Bahamas Komonwelt Gems Asosiesen, Romell K. Knowles, i tok, "Mipela i tok tenkyu long ol eksekutiv memba bilong Komonwelt Gems Federesen long ol i gat bikpela bilip olsem mipela inap long kamapim dispela gem na ol i makim Bahamas long kamapim 2017 Komonwelt Yut Gems.

"Mipela i tok tenkyu tu long Seketeri Jenerel bilong St. Lucia bikos em i namba wan man husat i gat strongpela bilip long karim gem i kam insait long Keribian."

Seketeri Jenerel bilong Bahamas, Presiden Wellington Miller, i tok tenkyu long Praim Minista bilong Bahamas, Perry G. Christie, Minista bilong Yut, Spot na Kaltsa, Dokta Daniel Johnson, na Minista bilong Turis, Obie Wilchcombe, long ol i bin givim bikpela sapot long taim ol kantri i resis long kamapim dispela gem.

"Dispela em i namba 6 raun bilong Komonwelt Gems bilong ol yangpela lain na em i wanpela bikpela spot resis we Bahamas bai kamapim dispela gem na

mipela i lukluk long kamapim namba wan pilai stret," Miller i tok.

"Dispela gem bai mekim na planti ol yangpela lain aninit long Komonwelt bai makim kantri bilong ol na resis. Planti lain bai kam long Bahamas long namba wan taim bilong ol."

Namba wan Komonwelt Yut Gem i bin kamap long Edinburgh, Skotland long yia 2000. Bihain i bin kamap long Bendigo, Australia long yia 2004. India i bin kamapim namba 3 resis bilong Komonwelt Yut Gems long yia 2008 long Pune. Namba 4 resis i bin kamap long Isle of Man, Yunaitet Kingdom long 2011 na namba 5 raun bilong Komonwelt Yut Gem i bin kamap long Apia, Samoa, long yia 2015. Bahamas bai kamapim namba 6 raun bilong Komonwelt Yut Gems long 2017.

Kaunsil Siaman bilong Noten Ailan Komonwelt Gems, Robert McVeigh, i tok, "Long makim maus bilong Noten Ailan Komonwelt Gems Kaunsil, mi gat bikpela amamas na tok orait long dispela ofa long kamapim Komonwelt Yut Gems long 2021."

Olgeta pilaia husat bai go pilai long NI bai go silip long Yunivesiti bilong NI. Ol program bilong spot em ol bai tokaut bihain.

NI i bin kamap namba 8 ples long total medal, aninit long 60 kantri i bin resis long Komonwelt Yut Gems i bin kamap long Samoa long 2015.

NI i gat 2 milien pipel na em i save pilai long olgeta Komonwelt Gems. NI i bin pilai tu long olgeta 5-pela raun bilong Komonwelt Yut Gems i bin kamap pinis.

NI i gat inap ekspirians long kamapim Komonwelt Yut Gem long 2021, bihain long Bahamas bai kamapim long 2017.

# Polye i salensim spot developmen

GAVMAN i yusim bilien kina long Pasifik Gems spot fesiliti aninit long Spot Faundesen na dispela i daunim tingting bilong ol spot manmeri bikos ol i askim long baim fi gen long yusim ol fesiliti.

Oposisen Lida, Don Pomb Polye, i gat bel hevi long dispela bikos ol i laik mekim mani long ol fesiliti, tasol na i daunim spot developmen bilong kantri.

"Long wanem as, Praim Minista na Spot Minista i makim fi long ol pipel bilong yumi stret, husat i mekim kantri i amamas taim ol i kamap namba wan long total medal tali long Pasifik Gems?"

"Pipel bilong yumi i fandim ol dispela fesiliti aninit long takis ol i save baim na em i no gutpela pasin long makim fi long ol gen, taim ol i laik yusim ol fesiliti," Polye i mekim dispela tok bihain long em i bin lukim TV program we spot menesa i tokaut long wari bilong em long dispela hevi.

Em i tok planti ol spot i no kamap bikpela yet na long developim ol dispela spot em i bikpela salens long ol spot edministreta na menesa.

Polye i tok moa olsem ol i



Oposisen Lida Don Pomb Polye i salensim developmen bilong spot long kantri. Polye i laikim Praim Minista Peter O'Neill na Spot Minista Tkatchenko long tokim PNG Spot Faundesen long makim liklik mani long tiket bilong ol spot fesiliti. Ol i no ken makim bikpela mani long get fi gen long ol pipel bilong yumi. Ol i ken makim get fi K10 long wan wan lain i orait. Polye i mekim dispela tok bihain long em i bin lukim TV program we spot menesa i tokaut long wari bilong em long dispela hevi.  
Piksa: Nicky Bernard

makim dispela kain fi long yusim ol fesiliti i save daunim na stopim ol dispela spot long kamap bikpela.

"Gavman mas lukluk gut long mekim mani long ol narapela rot.

"Tasol, narapela gavman bilong mipela i bilip olsem em i ken lukluk gut long ol dispela disisen long ol spotman na spotmeri bilong yumi i no inap long baim fi," Polye i tok.

Polye i laikim Praim Minista Peter O'Neill na Spot

Minista Tkatchenko long tokim PNG Spot Faundesen long makim liklik mani long tiket bilong ol spot fesiliti.

Mani bilong milien manmeri i save baim takis em ol i yusim long kamapim grensiti we ol i ken yusim ol dispela mani long ol narapela hap olsem rot, haus sik na skul long ol narapela senta.

"Ol i no ken makim bikpela mani long get fi gen long ol pipel bilong yumi. Ol i ken makim get fi K10 long wan wan lain i orait," Polye i tok.

# Fukuoka bai lukautim 2021 FINA Wol Sempionsip ...na Doha bai go pas long 2023 FINA Wol Sempionsip

SITI bilong Japan, Fukuoka, bai kamapim 2021 FINA Wol Sempionsip na FINA Wol Masta Sempionsip.

Tupela wankain resis bai kamap long Doha, Qatar, long yia 2023. Ol i bin kamap wantaim dispela mak o mekim disisen bihain long ol i vot long Budapest long kamapim FINA.

Nanjing Siti long Saina em i namba 3 siti husat i resis long kamapim dispela sempionsip.

Presiden bilong FINA, Dokta Julio C. Maglione i amamas na tokaut long dispela disisen long wanpela pres konprens.

"Nau mipela i tokaut long 3-pela siti i resis na winim olgeta mak bilong kamapim dispela bikpela gem. Tupela siti, Fukuoka na Doha, i strongpela poro bilong FINA na tupela bai givim ol namba wan samting bilong ogenaism dispela sempionsip," Maglione i tok.

Bipo, Doha i lukautim FINA Wol Swimming Sempionsip long yia 2014, na Fukuoka i hostim traim resis bilong FINA long namba tu taim, bihain long em i bin lukautim long yia 2001.

onsip," Maglione i tok.

Taun Meya bilong Fukuoka, Soichiro Takashima, i tok, "Mi gat 41 krismas i soim olsem mi i yangpela Meya bilong siti wantaim 1.5 milien pipel. Mi bilip olsem mi i makim dispela eria gut tru. Fukuoka tu em i yangpela siti na em i save gut long ol akwatik spot. Mipela i kisim inap save long 2001 na mipela bai gat moa sans long kamapim dispela kain gem bihain long mipela bai hostim 2020 Olimpik Gems long Tokyo."

"Astingting bilong hostim 2021 FINA Wol Sempionsip em i bilong soim kala bilong mipela long ol FINA Wol

Sempionsip bai kamap bihain," Takashima i tok.

Seketeri Jenerel bilong Qatar Olimpik Komiti, Dokta Thani Al Kuwari, i tok, "FINA famili i bin kam planti taim long Doha na olgeta lain i save gut long pasin bilong mipela long ogenaism ol bikpela resis.

"Spot em i namba wan tul bilong kamapim ol yangpela na kantri bilong yumi.

"Namba wan taim bilong lukautim FINA Wol Sempionsip long Midel Is em i wanpela bikpela rot bilong kamapim akwatik insait long kantri," Al Kuwari i tok.

Ol bai kamapim tupela hap bilong bikpela resis bilong FINA. Swimming, Synchronise (lain) Swimng na Raun Wara resis bai kamap long Aspire Jon Kompleks, na Open Wara Swimming na Hai Daiving bai kamap long Musium ov Islamik Art.

# Etletik PNG i tok klia long ol bai makim ol etlit

**ETLETIK PNG i tok klia long mak ol bai yusim long makim ol pilaia husat bai go long Olimpik Gems.**

Ol bai makim ol pilaia na kosa aninit long seleksen polisi we Olimpik Komiti i makim.

Long Ogas, 2015, ol i bin tokim ol pilaia long dispela seleksen polisi na nau ol i bin raitim long pepa na skelim long ol pilaia, kosa na ol lain bilong lukautim seleksen.

ETLETIK PNG bai makim wanpela man pilaia bilong ol Gem aninit long yunivesiti rul we Olimpik Komiti i tok orait long en. Na ol bai no inap lukim ol kwalifai standet na makim wanpela meri pilaia.

Ol pilaia resis long dispela seleksen em Nelson Stone, Mowen Boino na Theo Piniau. Ol pilaia husat i soim namba wan kala bilong namel long nau inap Jun em ol bai makim long resis wantaim.

Piniau i stap long skolasip long West Texas A&M Yuni-versiti long USA, na PNG Olimpik Komiti i baim tren-ing na resis program bilong Nelson Stone. Tasol, Mowen Boino i no gat wanpela sponsa long program bilong em yet.

"Tasol, long ol meri pilai, seleksen em i narakain lik-lik," Presiden bilong Etletik PNG, Tony Green, i tok.

"Mipela i bin lukim kala bilong ol pilaia long ol yia i go pinis, na luk olsem i no inap moa long wanpela pilaia bai kwalifai na mipela i bin tokaut long dispela rot pinis aninit long polisi.

"Em i klia olsem Toea Wisil i stap long gutpela ples long

makim em, sapos i no gat wanpela i ran long kwalifai taim. Tasol, mipela i gat seleksen rul i stap long rausim ol pilaia husat i no gat gutpela kala long go het."

Wisil na Donna Koniel i trening long Brisbane aninit long wankain skolasip program we Intanesenel Olimpik Komiti i sponsa long Wisil na IAAF i sponsa long Koniel.

Ol lain i go pas long seleksen hap i lukim olsem, Sharon Kwarula na Betty Burua, inap long ran long kwalifai taim, tasol tupela i pait yet bikos tupela i no gat fanding sapot.

Ol Jastifikesen Komiti bilong PNG Olimpik Komiti bai tok orait long ol bai makim ol pilaia. Ol Jastifikesen Komiti bai bung wantaim wan wan spot long wik i kam long toktok long ol bai makim ol etlit na opisal.

Wisil i resis long ACT Sempionsip long Canberra, Australia, long las wiken na em i stap long namba wan fom. Em i bin daunim nesanel rekot bilong em yet wantaim 0.003 seken na win long 200m resis insait long 23.43 seken. Na em i kam klostu long namba wan ran bilong em long 100m resis 11.44 seken long semi fainel na fainel wantaim.

Wisil i bin mekim strongpela stat long dispela sisen resis wantaim 3-pela 100m resis long Brisbane, Australia, wantaim 11.63 seken, tasol ol i painim aut olsem resis long Canberra em i moa kwik we planti pilaia wantaim Wisil i rekotim spel-taim long wiken.

"Wisil i go paslain kwik-



**Toea Wisil i stap long gutpela ples long makim em log kwalifai long Olimpik Gems, sapos i no gat wanpela i ran long kwalifai taim. Wisil i resis long ACT Sempionsip long Canberra, Australia, long las wiken na em i stap long namba wan fom. Em i bin daunim nesanel rekot bilong em yet wantaim 0.003 seken na win long 200m resis insait long 23.43 seken. Na em i kam klostu long namba wan ran bilong em long 100m resis 11.44 seken long semi fainel na fainel wantaim. Piksa i soim Wisil i redi long go resis long Rio Olimpik Gems. Piksa: Wantok**

taim long dispela resis i strongim em long resis long kamap kwalifai long Rio Olimpik Gems," Green i tok  
"Nau, Wisil i lukluk long em i gat sans long ran long wankain resis gen long Canberra Trek Klasik bihain long tupela wik.

"Stone i lukluk long namba wan resis bilong em long dispela sisen long Bris-ben. Sempion bilong 400m resis long Pasifik Gems i stap 3-pela wik long Brisbane, na em i lukluk long resis strong long strongim kala na fom bilong em."

# Nupela NSF em Wol Klas pilai graun

**Nicky Bernard i raitim**

NUPELA Nesanel Futbol Ste-dium long NCD em Wol klas pilai graun na em ken kisim planti ol Intenesenel gem long kam pilai insait long kantri.

Long opim dispela nupela stedium Praim Minista Peter O'Neill i tokim ol Papua Niugini manmeri na pikinini long lukautim long wanem dispela pilai graun i ken bringim yumi go long NRL resis long Australia.

Em i singaut tu i go long ol NRL Bod long luksave long tim bilong PNG long go in-

sait long resis bilong NRL.

Praim Minista i tok tenkyu i go Fletur Morobe long bikpela wok ol mekim long kamapim dispela nupela stedium, na tu em i tok tenkyu long Oil Search long putim mani go long dispela nupela NFS na Papua Ragbi Lig long givim ol dispela olpela Pot Mosbi Ragbi lig graun long kamap dispela Nesanel Futbol Stadium.

Dispela pilai namel long Penrith Panthers na SP PNG Hunters em namba wan pilai tu long opim dispela nupela NFS.



**Ol pilaia bilong Penrith Panthers i amamas na kisim pot wantaim ol sapota bilong ol long taim pilai i pinis long nupela Nesanel Futbol Stadium long Pot Mosbi. Poto Nicky Bernard**

# Geming Bod i helpim junia etlit

FOAPELA junia etlit bai resis long Saut Australian Sempionsip long dispela wiken long Adelaide, we Nesanel Gem-ing Bod i sapotim ol.

Gol medal wina long stipelses resis bilong ol meri long Pasifik Gems, Rama Kumilgo, i bin stap 5-pela wik long Adelaide wantaim tim poro bilong em, Jenny Albert, i trening wantaim kosa bilong ol, Peter Deane.

Ol i bung wantaim kwik rana, Charles Livuan, na 400m hadla, Ephraim Lerkin, husat i bin trening insait long tupela mun long Fiji wantaim Bola Tafoou, husat i kosa bilong sempion rana bilong Fiji, Banuve Tabakaucoro.

"Dispela em namba wan mak bilong program bilong mipela long resis long Wol Junia Sempionsip bai kamp long Bydgoszcz, Polan, long Julai," Presiden bilong PNG Etletik, Tony Green, i tok.  
"Mipela i bilip olsem planti etlit bai

inap long ran long kwalifai taim na em bai givim strong long ol long ol bai developim kala bilong ol long ol Pasifik Gems bai kam, na mipela bai i gat dispela program i go het.

"Mipela i tok tenkyu long Nesanel Geming Kontrol Bod long ol i bin helpim mipela wantaim K40, 000 long baim ol samting we Junia Program i sot."

Lerkin em i namba wan junia etlit, husat i ran namba tu long Mowen Boino insait long 54.29 seken na kwalifai taim em i 53.20 seken long Nesanel Sempionsip long las yia.

Kwalifai taim bilong 200m resis em i 21.35 seken long Gol Kos, Australia, resis, tasol Livuan i ran insait long 21.76 seken, bipo long Pasifik Gems long las yia.

Kumilgo i gat nesanel rekot long 3000m resis bilong ol meri wantaim 11 minit na 10 seken long Osenia Semp-

ionsip long las yia, na kwalifai taim em 10 minit na 45 seken.

"Charles na Rama i ful taim etlit long las yia na em i hat tru long tupela bai kamap long wankain hait taim tupela i stap olgeta taim long skul, tasol mipela bai redim wanem kain sapot we mipela i ken," Green i tok.

Tisa bilong Lerkin, Boino, i joinim Lerkin insait long tupela wik na tupela wantaim i resis long las wiken. Lerkin i ran insait long 54.62 seken na tisa bilong em i ran insait long 53.82 seken, we tupela i resis wankain stret.

Tupela bai ran gen long dispela wiken, we SA Open na anda 20 sempionsip i bung long resis wantaim tupela.

Narapela junia etlit i soim kala bilong em long USA. Hadla, Afure Adam, i resis long Pasifik Gems na em i gol meda wina tu long 4\*400m riley resis bilong ol meri.



**Hunters Em Mi Ya:** Wellington Albert i ran wantaim posta bilong em bihain long pilai i pinis. Em i pilai strong stret long kisim ples insait long Penrith Panther namba wan gret. Em i amamas tu long kam bek na pilai egens wantaim olpela tim bilong em Hunters na lukim tu ol famili. Poto Nicky Bernard



1



2



3



4



5



6

1 **YELO KAD:** Pilaia bilong Pom FC i kisim yelo kad long referi. Pom FC i aut long resis bilong NSL long wanpela poin bihain long Rapatona.

2 **KAM YA:** Pilaia bilong Gigira Laitepo i autim bal go long wan pilaia bilong em taim pilaia bilong Rapatona i kam klostu. Gigira i aut long resis bilong NSL na Rapatona wantaim Hekari bai kisim nem bilong Sauten long pilai wantaim ol Noten.

3 **TROMOI GUT:** Beta bilong Wolves i abrusim bal na ketsa bilong Yokomo i ketsim long sofbal pilai bilong long Bisini.

4 **YUPELA WE:** Pilaia bilong Fincop i wok long painim ol pilaia bilong em long salim bal taim ol BSP pilaia i bungim em.

5 **HOI REF OL STRIP YA:** Pilaia bilong 6-mile Storms i lusim bal taim tupela pilai bilong Dep Tigers i takolim em long fainol pilai bilong Ipatas Kap long Murray Bareks. Storms i winim golden pas long go pilai long neks mun.

6 **NUPELA PILAI MEKA:** Sab hoka bilong Hunters i pasim bal long pilaia bilong em. Em i setim wanpela trai na putim wanpela taim ol pilai wantaim Penrith Panthers long Mosbi. Panthers i win 20-12.

7 **YUPELA SMAIL:** Albert i kisim poto wantaim ol famili bilong em baihain long pilai i pinis.



7



## DIANA

Tuna

Niupela Swit Teist  
Nau Igat Moa Oil!



PNG's ORIGINAL TUNA

 Manufactured by:  
RD TUNA CANNERS LTD.

# Nupela Hunters i strong yet



Nicky Bernard i raitim

SP PNG Hunters i kamapim gutpela pilai long Sarere taim ol i kisim ol NSW Penrith Panthers long Nesenel Futbol Stediuim long Pot Mosb.

SP Hunters i go daun long Panthers 20-12 tasol dispela i no mekim ol sapota i wari long wanem ol i amamas long tim Hunters long pilai bilong ol.

Kosa bilong Hunters, Michael Marum i traim planti long ol nupela pilaia bilong em, na ol i soim kala bilong ol long stap insait long tim.

Planti bilong ol nupela pilaia bilong Hunters i pilai strong tru long stap insait long tim long pilai long namba wan gem bilong ol long mun antap we Kwinslan Kap bai kik ov.

Dispela yia bai namba tri yia bilong Hunters long pilai

resis long Kwinslan kap na kepten bilong ol Penrith Panthers Jamie Soward i tok sapos ol Hunters i pilai strong moa olsem gem bilong ol wantaim tim bilong em Panthers, bai ol ken go insait long fainel bilong Kwinslan Kap olsem las yia.

Soward i tok ol Hunters em strongpela tim stret long pilai wantaim, maski ol win long 20-12 skoa tasol Hunters tim i kam strong tru long taim pilai i laik pinis.

Soward i amamas long nupela Nesenel Futbol Stediuim na i tok olsem dispela nupela NFS i winim Penrith Stediuim long Australia. Em tok tu olsem, ol sapota bilong Hunters i gutpela tru na i soim olsem ragbi lig i gat planti sapota bilong en.

Hunters bai stretim ol gen na bai stat long trening long redi long namba wan pilai bilong we bai kamap long Australia long mun i kam.

**YU KAM:** Nupela rikrut bilong Hunters i traim strong bilong em na laik abrusim pilaia bilong Panthers taim kepten bilong Panther Jamie Soward i lukluk. Panthers i win 20-12 long nupela NFS long Pot Mosbi. *Poto Nicky Bernard.*